

清

史

稿

清史稿

本紀二十四

德宗本紀二

二十一年乙未春正月癸酉朔停筵宴乙亥日兵寇威海丁丑我海軍與戰於南岸敗績己卯吳大澂始出關視師辛巳威海陷守將戴宗騫死之改命聶士成統兵入關丁亥詔責李鴻章庚寅劉公島陷水師燬丁汝昌及總兵劉步蟾死之諭張之洞松椿防海贖清江水陸要衝保准通運辛卯授李鴻章爲頭等全權大臣使日本壬辰見各國使臣於文華殿陶模言喀什噶爾莎車和闐等屬戶民英印度部收買爲奴應由公家贖放從之內申葉志超張照瑛俱論斬己亥日本陷文登甯海偃煙台宋慶等及日人戰於太平山敗績走二月乙巳宋慶吳大澂敗日人於亮甲山參將劉雲桂守備趙雲奇戰死賑錦州甯遠災民丁未命聶士成總統津沽海口防軍乙酉日兵薄遼陽長順唐仁廉擊卻之庚戌日兵陷牛莊吳大澂退走日人遂襲營口癸丑馬玉崑敗日人於田莊台甲寅復戰敗績丙辰日兵陷田莊台吳大澂奔錦州宋慶退雙台丁巳以吳大

激師徒撓敗切責之戊午恭親王等奏撤海軍署免上元江甯等處淮安等衛  
賦課賑直隸水災庚申分神機營兵駐喜峯口癸亥命吳大澂解軍務幫辦來  
京湘鄂諸軍以魏光燾領之乙丑撥庫帑十萬加賑薊州等處災民戊辰知州  
徐慶璋集團民固守遼陽命裕祿濟饑械己巳賑玉田灤州樂亭水災日人狙  
擊李鴻章彈傷其頰庚午日人犯澎湖三月壬申朔命吳大澂回湖南巡撫任  
癸酉濟陽高家紙坊河決乙亥日兵陷澎湖戊子礮提督蔣希夷職逮問癸巳  
命郭寶昌隨同劉坤一辦防務己亥李鴻章與日本全權伊藤博文陸奧宗光  
馬關會議和約成定朝鮮爲獨立自主國割遼南地臺灣澎湖各島償軍費二  
萬萬增通商口岸任日本商民從事工藝製造暫行駐兵威海夏四月戊申撥  
京倉米石備順天平糶己酉天津海溢王文韶自請罷斥不許諭曰非常災異  
我君臣惟當修省惕厲以弭天災甘肅撤回叛陷循化廳雷正綰剿之庚戌命  
道員聯芳伍廷芳赴煙台與日本換約乙卯諭曰和約定議廷臣交章謂地不  
可棄費不可償當仍廢約決戰其言固出忠憤而未悉朝廷苦衷自倉卒開釁

戰無一勝近者情事益迫北可逼遼瀋南可犯畿疆瀋陽爲陵寢重地京師則宗社攸關况慈闈頤養廿餘年使徒御有驚藐躬何堪自問加以天心示警海嘯成災戰守更難措手一和一戰兩害兼權而後幡然定計其萬難情事言者所未及詳而天下臣民皆當共諒者也茲將批准定約特宣示前後辦理緣由我君臣惟期堅苦一心痛除積弊戊午諭軍機大臣及諸臣工和局已成勿再論奏留山東運糧十萬石備甯河等處賑命裕祿接濟甯錦等屬賑需己未賞前宿松縣知縣孫葆田五品卿銜辛酉達賴喇嘛受戒畢賚哈達念珠等物癸亥撥湖北漕米三萬石備甯錦等屬賑乙丑京師平糶命李經芳爲臺灣交地全權委員丙寅賜賂成驤等二百八十二人進士及第出身有差丁卯詔唐景崧來京五月辛未朔賑臨漳等縣水災庚辰蔣希夷論斬乙酉見俄使喀希尼法使施阿蘭於文華殿壬辰日本歸我遼南地丁酉免湖南新化雲南阿迷保山昆明上年被災田賦賑長武等縣水災癸亥災庚子唐景崧休致閏五月辛丑朔撥山東庫帑二萬助賑奉天壬寅撫恤江浙連漕稽候船戶萬餘人甲辰大

學士福錕致仕乙巳命直隸提督聶士成總統准軍駐津沽江西布政使魏光燾總統浙軍駐山海關四川提督宋慶總統毅軍駐錦州俱聽北洋大臣調度癸丑吳大澂罷戊午惠子潮嘉道裕庚四品京堂充出使日本大臣丁卯諭曰近中外臣工條陳時務如修鐵路鑄鈔幣造機器開鑛產折南漕減兵額創郵政練陸軍整海軍立學堂大抵以籌餉練兵爲急務以恤商惠工爲本源皆應及時興舉至整頓釐金嚴覈關稅稽察荒田汰除冗員皆於國計民生多所裨補直省疆吏應各就情勢籌酌辦法以聞六月甲戌孫毓汶以疾免丁丑賑熱河飢民乙酉軍機大臣徐用儀罷以麟書爲武英殿大學士崑岡以禮部尙書協辦大學士命錢應溥爲軍機大臣翁同龢李鴻藻均兼總理各國事務衙門行走戊子賑鍾祥等處水災秋七月甲辰沁河決乙巳滎澤河決丁未詔李鴻章入閣辦事授王文韶直隸總督兼北洋大臣戊申賑商州青澗等處水災雹災己酉予宋儒呂大臨從祀文廟壽張齊東河決豐陞阿遣戍軍台戊午賑鎮安等縣水災辛酉江西巡撫德馨有罪褫職色勒庫爾地震壬戌以回衆猖獗

禡總兵湯彥和職楊昌濬雷正綰並禡職留任丁卯已革提督黃仕林論斬八月壬申賑富川容縣水災丙子賑階文西甯等州縣水災己卯四川總督劉秉璋以不能保護教堂禡職丙戌命工部郎中慶常以五品京堂充出使法國大臣癸巳免雲南威遠被災田賦九月庚子賑梧州府屬火災留山東新漕備瀕河諸縣災賑乙巳留湖北冬漕三萬石備鍾祥等縣賑需丁未命魏光燾統軍援甘肅戊申免望都差徭及退出圈地額賦五成著爲令己酉免陝西前歲民欠暨華州開渠占地錢糧壬子見英使歐格訥於文華殿乙卯賑甘肅被擾各地難民戊午賑臨湘蛟災撥帑三萬購倉穀備常德衡州旱災壬戌見和使克羅伯於文華殿癸亥命宗人府府丞吳廷芬兼總理各國事務衙門行走丙寅後藏班禪額爾德尼來京謁陵進方物揭揚湖陽普甯等縣地震十月辛未楊昌濬罷以陶模署陝甘總督辛巳李鴻章與日使互換歸遼條約甲申長麟汪鳴鑾並以召對妄言禡職己丑初設新建陸軍命溫處道袁世凱督練丙申免江川被災田賦二年賑鶴慶等州縣水旱災十一月乙酉朔山東趙家口合龍

丁未免盛京被淹官莊額賦戊申留河南漕折八萬備內黃等縣工賑己酉以湖北布政使王之春充俄皇加冕賀使庚戌免奉天被兵各屬旗民兩年田賦並積年逋賦癸丑劉永福免癸亥甘肅提督李培榮以赴援西甯逗留職乙丑調董福祥爲甘肅提督仍總統甘軍前敵諸將均歸節制賑保山蛟災十二月戊寅壽張決口合龍庚辰撥庫帑六萬備湖北春賑癸巳改命李鴻章使俄邵友濂副之是月免陝西前歲逋賦奉天上年葦稅及官莊稅糧賑盛京萍鄉災發帑各十萬賑湖南雲南陝西各屬災

二十二年丙申春正月丙申朔停筵宴丁酉以特遣李鴻章使俄諭止邵友濂王之春毋往己亥賑長沙各府水旱災乙卯見各國公使於文華殿庚申命馮子材仍回廣東督辦欽廉防務二月庚午移塔爾巴哈台額魯克領隊大臣駐布倫布拉克伊犁察哈爾領隊大臣駐博羅塔拉壬申始議郵政與各國聯會開龍州鐵路劉銘傳卒丁亥戶部火三月戊戌額勒和布致仕癸卯開杭州商埠丁未命王文韶張之洞督辦蘆漢鐵路辛酉回匪窺珠勒都斯癸亥命董福

祥駐西甯專任剿撫魏光燾還駐河州尋命回陝西巡撫任夏四月壬申五台山菩薩頂災乙亥免昆明邱北被災夏糧辛巳命榮祿往天津閱新建陸軍戊子授崑岡體仁閣大學士榮祿以兵部尙書協辦大學士五月丁酉諭李秉衡查州縣糧賦浮收者覈減之免恩安被災額賦辛丑鄭州文廟災是月上數奉皇太后臨醇王邸視福晉疾癸卯醇賢親王福晉葉赫那拉氏薨輟朝十一日上奉皇太后臨邸視殮越日復往奠祭懿旨醇賢親王福晉薨逝應稱曰皇帝本生妣乙巳上成服壬子免安徽歷年通賦甲子緩鄂倫春牲丁進貂貢六月丙寅諭奎順撫恤青海蒙民丁卯河決利津戊辰免浙江歷年各場積欠鹽課鹽課庚午賑浙江風災壬申醇賢親王福晉金棺奉移上躬詣臨送甲戌上奉皇太后如醇王園寓臨奠福晉金棺己卯諭整頓長江水師壬午命裕祿兼充船政大臣丙戌松潘番亂官軍剿平之丁亥尤王大臣請神機營練兵處仿西制練兵辛卯永定河溢是月賑大東溝海溢災安徽湖北較災秋七月甲午朔日有食之丁酉順天東南各屬水命孫家鼎等速籌賑需乙巳留南漕十萬石



於天津備賑八月乙丑以關內外回匪漸平諭陶模董福祥安輯降衆搜捕餘匪已已川軍剿贍對疊克要隘進逼中贍庚辰諭鹿傳霖贍對用兵乃暫時辦法事定後仍設番官否當再審詳不得因此苛責喇嘛轉生他衅慎勿鹵莽而行己丑諭刑部訊獄應速結毋任延宕壬辰禁各省濫用非刑九月丙申前大學士福錕卒免陝西前歲通賦己亥東陵蟲災丙午先是王文韶張之洞請立招商輪船總公司舉盛宣懷督辦至是賞宣懷四品京堂准專奏大學士張之萬致仕丁未見德使海靖比使費葛於文華殿庚戌命李鴻章在總理各國事務衙門行走癸丑李秉衡言勘明黃河尾閘擬由舊黃河東岸挑濬新河仍導歸舊河入海諭以大舉興辦務期一勞永逸以副委任是秋賑河南奉天湖北安徽山東山西吉林黑龍江水災湖南蛟災及陝甘水災雹災新疆蝗災雹災廣東洋面風災冬十月壬戌朔賑湖北江漢水災癸亥辦河州冬賑甲子增設蘇州杭州沙市思茅四關內寅諭陶模選廉明賢吏和輯漢回偶有爭執專論是非準情理以劑其平並分別撫卹被兵區域諭平回功予董福祥騎都尉世

職授陶模陝甘總督饒應祺新疆巡撫子奎順魏光燾優叙其餘甄叙有差甲戌永定河決口合龍戊寅定朝鮮設領事不立條約不遣使不遞國書以總領事一人駐其都城庚辰命左都御史楊儒充出使俄奧荷大臣道員羅豐祿充出使英義比大臣黃遵憲充出使德國大臣伍廷芳充出使美日祕大臣癸未免武清等州縣秋賦雜課乙酉賑華州等處水災己丑以徐桐爲體仁閣大學士李鴻藻以禮部尙書協辦大學士十一月戊申冬至祀天於圓丘己酉免朝賀辛亥免河洮等處被災賦課丁巳命工部侍郎許景澄充出使德國大臣是月賑山東四川水災十二月乙丑初鹿傳霖屢奏瞻對宜剿擬收回後改設漢官上慮失達賴心命鹿傳霖文海等詳議至是疏陳瞻民向化藏番震懾各情因諭剴切勸導達賴期於保藏保川兩無窒礙賑四川東鄉等屬災丙子免遼陽各村屯糧賦綏德等州縣逋糧

二十三年丁酉春正月辛卯朔停筵宴丁酉免山東光緒初年逋賦辛亥留湖北漕米充工賑乙卯見美法英德荷比俄義日本及日奧諸國公使於文華殿

二月壬戌命戶部侍郎張蔭桓使英庚午河決歷城章邱己卯命崇禮許應騷在總理各國事務衙門行走三月癸巳詔汰冗兵甲辰懿旨發內帑十萬賑四川五萬賑湖北並以庫帑十萬加賑四川夔綏忠三屬辛亥免銅仁青谿被水田賦丁巳初設海參崴委員夏四月乙亥李秉衡奏減山東錢漕丙申詔棍噶札拉參胡圖克圖嘉穆巴圖多普准轉世爲八音溝承化寺胡圖克圖甲辰張之萬卒贈太保丁未上詣本生妣醕賢親王福晉園寢周年釋服壬子予呂海寰四品京堂充出使德荷二國大臣六月己卯賑崇陽等縣水災是夏見奧使齊幹俄使烏爾他木斯科英使寶納樂日使矢野文雄於文華殿秋七月庚寅李鴻藻卒丙申命廖壽恒在總理各國事務衙門行走辛丑復故陝西固原提督雷正綰原官甲辰免岷州衛二十四寺進獻並展緩馬貢甲寅平遙普洞卹山陷入地中八月己巳靖西地震壬申命翁同龢以戶部尙書協辦大學士癸未弛科布多札拉沁寶爾吉鑛禁許蒙漢民人開採乙酉以鹿傳霖於德爾格忒土司措置失宜罷改土歸流議釋土司昂翁降白仁青暨其家屬仍回德爾

格式管土司事九月戊子鹿傳霖罷己丑命德爾格忒撤兵戊戌見挪威使柏固於文華殿甲辰達賴喇嘛請還瞻對地諭恭壽等會商以聞丙午利津決口合龍乙卯復故陝甘總員楊昌濬官是秋賑陝西雹災水災湖南北江西廣東安徽雲貴水災新疆蝗災戊午廣西巡撫史念祖坐事褫職壬申曹州匪戕害德國教士命李秉衡察勘之戊寅德以兵輪入膠澳壬午免樂亭等州縣被災額賦是月賑廣東風災陝西雹災湖南江南水災十一月辛卯撥江北漕米三萬石備徐海各屬賑甲午詔罷三瞻改土歸流議仍隸達賴喇嘛辛丑諭安撫江蘇各屬饑民丁未英使資納樂入見癸丑冬至祀天於圓丘甲寅免朝賀昭烏達盟旗匪平十二月甲子利津河決己巳免安州澇地租乙亥三巖野番就撫改設土千戶隸巴斯能朱窩章谷兩土司歸流議戊寅詔各省保護教堂教士免狄道巴燕戎格等處額賦

二十四年戊戌春正月乙酉朔日有食之元旦受禮改於乾清宮停宗親宴戊子詔各省大吏定議籌餉練兵速覆以聞庚寅定經濟特科及歲舉法命中外

保薦堪與特科者乙未免建水被旱夏糧已酉見各國公使於文華殿壬子免石屏昆明夏糧二月甲子命廖壽恒在軍機大臣上學習行走丙寅免青海阿里克番族馬貢銀乙巳留江北漕米一萬石賑徐州災丁丑命神機營選練先鋒隊庚辰詔武科改試槍礮停默寫武經三月丁亥詔立義倉戊子俄使巴布羅福覲見乙巳除新化被水額賦是月開直隸北戴河至秦王島湖南岳州福建三都澳口岸閏三月乙卯召張之洞來京丙辰麟書卒庚申以德人入卽壘文廟毀聖賢像下總署察問乙丑臨恭親王邸視疾甲戌上侍皇太后幸外火器營教場閱火器健銳神機三營及武勝新隊操凡三日丁丑以湖北沙市焚毀教堂諭張之洞回任續賑徐海災戊寅見德親王亨利於玉瀾堂己卯還宮免新興被旱額賦庚辰見法使畢勝於文華殿壬午安徽鳳潁泗災是春以膠州灣租借於德意志旅順口大連灣遼東半島租借於俄羅斯夏四月壬辰恭親王奕訢薨輟朝五日素服十五日臨邸賜奠懿旨特諡曰忠守衛園寢增設丁戶每祭祀官經理之孫貝勒溥偉襲甲午懿旨恭忠親王功在社稷應配饗

太廟詔中外臣工當法恭忠親王各據忠悃共濟時艱己亥授榮祿爲文淵閣大學士剛毅爲兵部尙書協辦大學士乙巳詔定國是諭中外大小諸臣自王公至於士庶各宜發憤爲雄以聖賢義理之學植其根本兼博采西學之切時勢者實力講求以成通達濟變之才京師大學堂爲行省倡尤應首先舉辦軍機大臣王大臣妥速會議以聞內午詔各省立商務局賜夏同龢等三百四十人進士及第出身有差己酉翁同龢能選派宗室王公出洋遊歷近支王貝勒等上親察之公以下及閒散人員由宗人府保薦召王文韶來京裁督辦軍務處庚戌召見工部主事康有爲命充總理各國事務衙門章京辛亥前藏達賴喇嘛貢方物五月癸丑朔詔陸軍改練洋操令營弁學成者教練於北由新建陸軍於南由自強軍派往各疆臣限六閱月舉併餉練兵及分駐地妥議以聞其軍械槍礮各省機器局酌定格式精求製造甲寅賑棲霞火災丁巳詔自下科始鄉會歲科各試向用四書文者改試策論命孫家鼐以吏部尙書協辦大學士王文韶以戶部尙書爲軍機大臣兼總理各國事務衙門行走授榮祿

直隸總督兼北洋大臣庚申趣盛宣懷蘆漢鐵路刻日興工並開辦粵漢甯滬各路甲子詔以經濟歲舉歸併正科歲科試悉改策論毋待來年丁卯詔立京師大學堂命孫家鼐管理實舉人梁啟超六品銜辦理譯書局戊辰詔興農學諭曰振興庶務首在鼓勵人材各省士民著有新書及創新法成新器堪資實用者宜懸賞以勸或試之實職或錫之章服所製器給券限年專利售賣其有獨力創建學堂開闢地利興造槍礮廠者並照軍功例賞勵之辛未免祿勸被水田糧癸酉詔八旗兩翼諸營均以其半改習洋槍擡槍以奕劻等管理驍騎營崇禮等管理護軍營甲戌詔改直省各屬書院爲兼習中西學校以省書院爲高等學郡書院爲中等學州縣書院爲小學其地方義學社學亦如之乙亥命裕祿爲軍機大臣丙子諭各省州縣實力保護教堂丁丑命三品以上京堂及各省督撫學政舉堪與經濟特科者頒士民著書製器暨創興新政獎勵章程命中外舉製造駕駛聲光化電人材戊寅詔各省保護商務免海康遂谿上年被災額賦賑長安等州縣水災雹災六月癸未朔詔改定科舉新章丙戌賑

徐海災已丑詔頒張之洞著勸學篇令直省刊布命康有爲督辦官報壬辰命榮祿會同張之洞督辦蘆漢鐵路鬱林梧州土匪會匪相結爲亂陷容興業陸川三縣官軍剿平之丙申饒應祺進回部貢金丁酉命漢詹科道輪班召對部院司員條列時事堂官代陳士民得上書言事設鑛務鐵路總局於京師王文韶張蔭桓專理之庚子湖南設製造槍礮兩廠辛丑賑甯羌火災洵陽等縣水災雹災癸卯命伍廷芳賑古巴華氓乙巳諭曰時局艱難亟須圖自強之策中外臣工墨守舊章前經諭令講求時務勿蹈宋明積習訓誨諄惟是更新要務造端宏大條目繁多不得不廣集衆長折衷一是諸臣於交議之事當周諮博訪詳細討論毋緣飾經術附會古義毋膠執成見隱便身圖倘面從心違致失朝廷實事求是本旨非朕所望也朕深惟窮變通久之義創建一切實具萬不得已之苦衷用申諭爾諸臣其各精白乃心力除壅蔽上下一誠相感庶國是以定而治道蒸蒸矣諭南北洋大臣籌辦水師及路鑛學堂諭各省廣開通商口岸命黃遵憲以三品京堂充駐朝鮮大臣是夏廣東九龍半島山東威海



衛俱租借於英吉利秋七月甲寅詔停新進士朝考並罷試詩賦賑奉天被賊  
各廳縣災丙辰詔於京師設農工商總局以端方徐建寅吳懋鼎督理並加三  
品卿銜命出使大臣設僑民學堂於英美日本各國丁巳河決山東上中游濟  
陽等六縣同時並溢己未詔定於九月十五日奉皇太后幸天津閱兵移沙市  
關監督荆宜施道江陵縣並駐沙市鎮壬戌賑南陽水災乙丑詔裁詹事府通  
政司大理光祿太僕鴻臚諸寺歸併其事於內閣禮兵刑部兼理之裁湖北廣  
東雲南巡撫以總督兼管之河東河道總督併於河南巡撫兼裁各省糧道鹽  
道庚午以抑格言路首違詔旨奪禮部尙書懷塔布許應駙侍郎堃岫徐會澧  
溥頤曾廣漢等職賞上書主事王照四品京堂辛未頒旨國藩州縣清訟事宜  
及功過章程於各省並增道府功過諭疏導京師河道溝渠平治道塗諭各省  
實行團練賞內閣侍讀楊銳中書林旭刑部主事劉光第江蘇知府譚嗣同並  
加四品卿銜參預新政賑建水水災癸酉罷李鴻章總理各國事務衙門行走  
以裕祿爲禮部尙書在總理各國事務衙門行走乙亥置三四五品卿三四五

六品學士丙子賑泰和水災丁丑召袁世凱來京諭曰國家振興庶政兼采西法誠以爲民立政中西所同而西法可補我所未及今士大夫昧於域外之觀輒謂彼中全無條教不知西政萬端大率主於爲民開智慧裕身家其精者乃能淑性延壽生人利益推擴無遺朕夙夜孜孜改圖百度豈爲崇尚新奇乃眷懷赤子皆上天所畀祖宗所遺非悉使之康樂和親未爲盡職加以各國環相陵逼非取人之所長不能全我之所有朕用心至苦而黎庶猶有未知職由不肖官吏與守舊士夫不能廣宣朕意乃至胥動浮言小民搖惑驚恐山谷扶杖之民有不獲聞新政者朕實爲歎恨今將變法之意布告天下使百姓咸喻朕心共知其君之可恃上下同心以成新政以強中國朕不勝厚望焉諭各省撤驛站設郵政嚴米糧出口禁八月壬午朔命戶部編定歲出入表頒行之諭出使大臣徵送僑民歸國備任使命袁世凱以侍郎候補專任練兵事宜丙戌見日本侯爵伊藤博文署使林權助於勤政殿賑射洪等縣水災略陽等縣水災雹災丁亥皇太后復垂簾於便殿訓政詔以康有爲結黨營私莠言亂政褫其

職與其弟廣仁皆逮下獄有爲走免戊子詔捕康有爲與梁啟超庚寅戶部侍郎張蔭桓翰林院侍讀學士徐致靖御史楊深秀暨楊銳林旭劉光第譚嗣同並坐康有爲黨逮下獄辛卯上稱疾徵醫天下召榮祿來京命逮文廷式捕孫文壬辰詔復設詹事府通政司大理光祿太僕鴻臚諸寺禁官民擅遞封章罷時務官報各省祠廟毋改學堂命吏部侍郎徐用儀在總理各國事務衙門行走癸巳撥江漕八萬石改折備徐海賑賑高州水災甲午楊深秀楊銳林旭劉光第譚嗣同康廣仁俱處斬謫張蔭桓新疆徐致靖禁錮命榮祿爲軍機大臣以裕祿爲直隸總督兼北洋大臣乙未以康有爲大逆不道構煽陰謀頒殊諭宣示臣下罷巡幸天津閱操命榮祿管兵部事兼節制北洋諸軍及宋慶軍丁酉籍康有爲梁啟超家命趙舒翹會同王文韶督辦礦路總局諭蘇浙新漕運京罷改折議留山東新漕米石備賑戊戌賞袁昶三品京堂在總理各國事務衙門行走庚子李端棻以濫保褫職戍新疆褫王照職籍其家逮捕辛丑賞前御史文悌知府壬寅黃遵憲以疾免賞李盛鐸四品京堂充出使日本大臣陳

寶箴以濫保奪湖南巡撫任癸卯詔疆臣飭吏治培人才開財源修武備舉劾  
牧令整齊營規詔言責諸臣指陳國計得失其淆亂是非事攻訐者罪之乙巳  
懿旨復鄉會試及歲科考舊制罷經濟特科罷農工商局丙午端方進所編勸  
善歌詔頒行懿旨命疆臣保衛民生慎選循良整飭保甲團練凡水利蠶桑及  
製造販運資民間利賴者以時教導之申聯名結會之禁授榮祿爲欽差大臣  
己酉命裕祿會辦蘆漢等處鐵路設上海漢口水利局九月辛亥朔懿旨一切  
政治關國計民生者無論新舊仍次第推行建言諸臣章奏務裨時局毋妄意  
揣摩癸丑發內帑二十萬賑山東水災甘肅新疆地震丁巳廣西匪平己未命  
軍機大臣會大學士及部院議治河之策辛酉初強劫盜案不分首從至是命  
樞臣暨法司詳議區別代州地震壬戌免陝西咸甯等處迪課戊辰復武鄉會  
試及童試舊制惟管用武進士及投標武舉令習槍礮復置湖北廣東雲南巡  
撫河東河道總督免裁糧道等缺己巳命許景澄在總理各國事務衙門行走  
甲戌復刑名解勘舊制除軍務省分及情事重大者仍就地正法餘不准行丙

子命胡燏棻在總理各國事務衙門行走己卯權停福州船廠製造庚辰命李鴻章往勘山東黃河是月賑直陝川鄂蘇滇晉新等各省災冬十月辛巳朔享太廟禮親王世鐸攝行是後郊廟祀典皆遣代至辛丑冬自西安還京始親詣丙戌命道員張翼督辦直隸暨熱河礦務立公司賑順天各屬災丙申賑韓城等縣災己亥命戶部撥帑八萬備安徽賑辛丑追奪翁同龢職前湖南巡撫吳大澂坐事褫職濟陽決口合龍壬寅懸賞購捕康有爲梁啟超王照甲辰允榮祿請以宋慶磊士成袁世凱董福祥所部分立四軍別募萬人爲中軍乙巳見俄使格爾思於勤政殿命胡燏棻督辦津鎮鐵路以張翼副之丁未賑羅平水災雹災十一月癸丑諭張汝梅辦山東災賑賞桂春三品京堂命在總理各國事務衙門行走甲寅命啟秀爲軍機大臣趙舒翹聯元並在總理各國事務衙門行走丁巳留河南漕折於滑縣備賑撥庫帑二十萬於江蘇備賑己巳命溥良察山東賑庚午命裕庚在總理各國事務衙門行走辛未命疆臣均兼總理各國事務大臣銜壬申賑土魯番等處水災蝗災丁丑以稱疾停年節升殿筵

宴戊寅罷直隸練軍十二月丙戌湖北巡撫曾鈺坐事免癸巳命馬玉崑往河南辦理防剿罷胡燏棻津蘆路督辦以許景澄代之丁酉免漢陽等州縣被災額賦壬寅改湖北漢口同知爲夏口撫民同知戊申發內帑五萬於清淮備賑二十五年己亥春正月庚戌撫卹豫皖被災州縣災民丙辰詔清庶獄庚申免渦陽等州縣被賊稅糧辛酉止各國駐京公使覲賀壬戌再撥部帑五萬於安徽備賑丙寅召李秉衡來京二月甲申申諭各省辦積穀清訟團練保甲丁亥命武勝新隊名曰虎神營舉行京師保甲戊戌膠州灣德兵藉詞護教入沂州境命呂海寰告德國外部止其進兵以新建陸軍訓練有效予袁世凱優敘庚子命副都統壽山募練十六營爲鎮邊新軍甲辰德兵至蘭山丁未陷日照城三月乙卯諭有漕各廳州縣自今冬始改徵本色運京師丁丑召蘇元春來京夏四月癸未諭曰近因時事艱難朝廷孜孜求治疊諭疆臣整頓一切旋據覆陳練兵籌餉保甲團練積穀各事雖匪空言尙虛確效用再諭令所籌諸務速卽興辦仍將有無成效據實以聞申諭疆臣切實校閱營伍又諭察勘荒田勸

導民墾勿任吏胥訛擾亦毋遽擬升科義人以兵艦來閩登三門灣諭嚴戒備  
己丑命剛毅往江南諸省覈庫藏出納實數癸巳命聶士成軍馬步四營駐熱  
河實邊防丙申諭劉坤一等集重兵爲備義兵登陸即迎擊之丁酉命按察使  
李光久督辦浙江防剿長順往吉林稽察練兵乙巳詔關稅釐鹽諸課歲有常  
經疆吏膽狗不能力除積弊大學士軍機大臣其詳覈會議以聞壬子命吳廷  
棻在總理各國事務衙門行走甲寅神機營兵廠藥庫火乙卯命太僕少卿裕  
庚充出使法國大臣乙丑命正定總兵楊玉書統練軍駐熱河除安化武岡新  
甯被水田賦己巳岳州開商埠移岳常澧道駐之兼岳州關監督六月戊子免  
迪化等屬通賦丁酉諭整飭海軍除積弊庚子賑廬陵等縣水災秋七月庚戌  
以法人租借廣州灣命蘇元春往會勘乙卯訂朝鮮通商條約丁巳開秦皇島  
商埠己巳命剛毅往廣東清釐財政庚午命蘇元春赴淮徐練兵聽榮祿節制  
八月丁亥甘肅海城回亂官軍剿平之己亥詔各省宣講聖諭廣訓甲辰錦州  
廣寧匪亂剿平之九月丁未以旱詔求直言庚戌詔清訟獄緩徵輸諭疆吏整

躬率屬持公道順輿情己未副都統壽長以廢弛營務褫職謫戍榮和褫職逮問辛酉命李徵庸充督辦四川商礦大臣甲戌義人兵艦續至諭直魯江浙嚴防是秋賑浙江湖南甘肅水災陝西旱災冬十月庚寅命李秉衡巡閱長江水師丙申命李鴻章爲通商大臣考察商埠壬寅免陝西咸寧等處前歲通賦十一月癸丑命太僕寺卿徐壽朋充出使韓國大臣甲寅廖壽恆罷軍機大臣命趙舒翹在軍機大臣上學習行走免北流被賊上年通賦壬戌再暴康有爲梁啟超罪狀懸賞嚴捕戊辰孫家鼐以疾免己巳以戶部尙書王文韶協辦大學士十二月甲戌朔詔停年節升殿筵宴丙子舉行察典敕毋冒濫乙酉免榆林等處被災田糧己丑罷蘇元春江南練兵回廣西提督任乙未命陳澤霖募勇駐江北操練爲武衛先鋒右軍丁酉詔以端郡王載漪之子溥儀爲穆宗嗣封皇子命崇綺直弘德殿授皇子溥儀讀壬寅詔來年三旬壽辰停朝賀筵宴止文武大吏來京祝嘏特舉恩科明年庚子鄉試次年辛丑會試其正科鄉會試遞推於辛丑壬寅年舉行是冬賑山西雲南陝西甘肅山東等屬災是歲廣州



灣租借於法郎西並開滇越鐵路

二十六年庚子春正月甲辰朔詔以三旬慶辰加宗支近臣恩賞己酉命醇親王載灃直內廷命侍講寶豐直弘德殿停本年秋決壬子先是知府經元善聯名上書諫立嗣至是詔嚴捕治罪尋籍其家戊子詔大索康有爲梁啟超毀所著書閱其報章者並罪之壬戌三嚴夷平增設巴塘等處土官各職癸亥總署與法人議廣州灣租約訂期九十九年甲子留南漕三萬石賑河北災民是月拳匪起山東號義和拳會假仇教爲名劫殺相尋蔓延滋害二月丙子河決濱州乙酉免昆明等州縣被災額賦戊戌定墨國條約三月戊申命李盛鐸使日本賀其太子聯姻呂海寰使德賀其太子加冠壬子濱州決口合龍癸丑以旱詔中外慮凶甲寅賞高廣恩四品京堂直弘德殿丁巳命內閣學士桂春充出使俄國大臣尋命兼使奧國撥部帑十萬賑山東貴州各屬水災己未靖遠夷就撫置諸夷土官壬戌命袁世凱集新兵二十營增立一軍爲武衛右軍先鋒全軍翼長夏四月乙酉善聯罷以許應騷兼管船政大臣庚寅義和拳入京師

詔步軍統領等會議防禁以聞辛卯免宣威昆明被水秋賦丙申賑重慶等處水旱災丁酉總署言拳會造言煽惑人心浮動易肇衅端諭所司妥議授李鴻章兩廣總督庚子免新化等州縣被水額賦是月拳匪焚毀保定鐵路副將楊福同往鎮攝行及涑水被戕五月癸卯拳匪毀琉璃河長辛店車站局廠命聶士成護蘆保津蘆兩路防禦之甲寅命載漪管總理各國事務衙門啓秀溥興那桐同時兼行走罷廖壽恆乙卯拳匪殺日本使館書記杉山彬於永定門外丁巳諭令馬玉崑赴京西剿拳匪大沽戒嚴己未拳匪擾五城坊市流血詔步軍統領神機虎神營武衛中軍會巡大臣巡察街陌分駐九門監啓閉召李鴻章袁世凱入衛庚申榮祿以武衛中軍護各國使館命李端遇王懿榮爲京師團練大臣召李秉衡及馬玉崑統兵來京是夕拳匪焚正陽門城樓閭市灰燼庚申詔剛毅董福祥募拳民精壯者成軍自餘遣散辛酉詔各省以兵入衛外軍攻大沽口提督羅榮光不能禦走天津死之大沽遂陷裕祿以捷聞詔發內帑十萬犒師壬戌命徐桐崇綺會同奕劻載漪等商軍務癸亥命許景澄那桐

往告各國公使速出京自庚申至於是日皇太后連召王大臣等入見諸衆論載漪持戰議甚堅載助載謙載潤徐桐崇綺啟秀溥良徐承煜等更相附和榮祿依違其間獨許景澄袁昶言匪宜剿辦不可開殺使臣忤公法辭殊切直故有是命甲子拳匪戕德使克林德於崇文門內乙丑詔以中外釁啟飭戰備罷崇禮步軍統領以載助代之發倉米開糶濟民食庚午召鹿傳霖來京六月辛未朔諭順天府五城平糶瘞教民暴骸癸酉命倉場侍郎劉恩溥往天津募水會強壯者編立成軍與通州武清東安團民駐直隸濟之餉械發倉於通州開糶長萃等言津通道阻請暫停漕運不許乙亥諭各省護教士回國教民悔悟自首者許自新己卯南漕運阻命清江浦置局採買運京壬午調李鴻章爲直隸總督兼北洋大臣趣兼程來京乙酉詔展緩本年恩科鄉試明年三月八日舉行會試八月八日舉行庚子正科鄉試及會試以次遞推外兵襲天津聶士成戰於八里臺死之戊子以呂本元爲直隸提督天津陷裕祿宋慶馬玉崑並退守北倉庚寅命顧璜張仁黼會辦河南團防下戶部尙書立山於獄辛卯詔

緝戕害德使凶犯額勒和布卒丙申上三旬萬壽東華門不啓羣臣朝賀皆自  
神武門入免疏附拜城被災額賦賑福建水災秋七月庚子朔命李秉衡幫辦  
武衛軍事張春發陳澤霖萬本華夏辛酉諸軍並聽節制壬寅殺吏部侍郎許  
景澄太常寺卿袁昶乙巳調馬玉崑爲直隸提督丁未命榮祿以兵護各國公  
使往天津己酉外兵據北倉庚戌陷楊村直隸總督裕祿自殺壬子授李鴻章  
全權大臣與各國議停戰外兵襲蔡村癸丑李秉衡戰於蔡村敗績外兵進占  
河西塢甲寅增祺言蓋平熊岳先後失守丙辰殺戶部尙書立山兵部尙書徐  
川儀內閣學士聯元李秉衡戰敗於張家灣死之丁巳外兵陷通州命剛毅幫  
辦武衛軍事己未德奧美法英義日俄八國聯兵陷京師庚申上奉皇太后如  
太原行在貫市壬戌次懷來命榮祿徐桐崇綺留京辦事癸亥廣東布政使岑  
春煊率兵入衛遂命扈蹕甲子次沙城堡懿旨命岑春煊督理前路糧臺丁丑  
次雞鳴驛下詔罪己兼誡中外羣臣丙寅次宣化命萬本華孫萬林奇克仲布  
軍聽馬玉崑節制駐後路丁卯詔求直言免蹕路所過宛平昌平等處錢糧一

年八月庚午朔次左衛辛未次懷安壬申次天鎮詔奕劻還京會李鴻章議和  
癸酉次陽高甲戌次聚樂鎮太監張天順騷擾驛站處斬乙亥次大同命劉坤  
一張之洞會議和局以載漪爲軍機大臣戊寅賞隨扈王公暨大小臣工津貼  
銀兩己卯次懷仁命京師部院卿寺堂官暨內廷行走者除留京外均率司員  
赴行在辛巳次廣武鎮命程文炳統軍駐潼關壬午次陽明堡諭榮祿收集整  
理武衛中軍癸未次原平鎮諭廷雍督剿直屬拳匪甲申次忻州丙戌次太原  
御巡撫署爲行宮免蹕路所過天鎮陽高等州縣今歲額賦丁亥西安等府旱  
戊子諭榮祿約束武衛中軍癸巳詔有司勸教民安業拳民被脅者令歸農乙  
未賑四川各屬災閏八月庚子朔賑麗水等縣水災辛丑追悼德使克林德命  
崑岡往奠之諭庇爭欣卹罪削莊親王載勛怡親王溥靜貝勒載濂載瀅爵罷  
載漪載瀾剛毅趙舒翹英年職並下府部議命鹿傳霖爲軍機大臣壬寅以日  
書記杉山彬被戕遣那桐使日本致祭賻毓賢罷乙巳詔幸西安丁未啟蹕是  
日次徐溝戊申次祁縣己酉次平遙庚戌次介休辛亥次靈石壬子次霍州召

榮祿赴行在甲寅詔改陝西巡撫署爲行宮乙卯次平陽丙辰次史村驛諭北  
五省嚴捕自立會黨戊午次聞喜己未詔以西幸陵寢壇廟久疏對越命奕劻  
遴近支王貝勒代享太廟及祭東西陵太常寺派員祭壇廟尋令今歲除夕來  
歲元旦祀典並遣代行趣近省解京餉給在京官弁俸糧授奕劻全權大臣會  
李鴻章議和約劉坤一張之洞仍會商辛酉次臨晉癸亥次蒲州諭江蘇等省  
解款百萬濟京城俸饌免蹕路所過太原陽曲等屬今歲額賦乙丑次潼關賑  
福州水災丁卯次華陰命敬信溥興管理虎神營戊辰次華州九月己巳朔次  
渭南壬申至西安府御巡撫署爲行宮甲申以裕綱爲駐藏辦事大臣丙子予  
殉難祭酒王懿榮世職並旌其妻謝氏子婦張氏乙卯李鴻章奏誅附匪逞亂  
道員譚文煥壬午德人陷紫荆關布政使升允退軍浮圖億尋奏德兵退易州  
上以其張皇切責之己丑罷保德貢黃河冰魚庚寅創載漪爵與載助溥靜載  
澄並交宗人府圈禁載瀾英年鑄級趙舒翹奪職留任剛毅病故免議毓賢戊  
極邊壬辰予閩家自焚黑龍江將軍延茂祭酒熙元侍讀寶豐崇壽等卹乙未

賑陝西荒內申免陝西咸甯等縣逋賦戊戌免雲南各廳州縣暨土司被災逋賦冬十月戊申皇太后聖壽節停筵宴庚戌詔董福祥不諳外情遇事鹵莽奪提督仍留任辛亥發內帑四十萬賑陝西飢民趣江鄂轉漕購糧以濟癸丑授王文韶爲體仁閣大學士崇禮徐郁並協辦大學士丁巳諭廓爾喀前後藏及各土司暫勿貢獻癸亥開秦晉實官捐例賑旱災十一月壬申免長安額賦十之五乙亥清平苗匪王老九等作亂官軍剿擒之庚辰命楊儒爲全權大臣與俄議交收東三省事辛巳以長沙等府旱災開賑捐事例壬午免蹕路所經山西各州縣額賦十之二癸未命盛宣懷爲會辦商務大臣乙酉命徐壽朋赴京隨辦商約癸巳安徽開籌餉捐例內寅增祺坐擅與俄人立交還奉天暫行約予嚴議尋褫職十二月甲辰詔免明年元旦禮節丁未詔議變法軍機大臣大學士六部九卿出使大臣直省督撫參酌中西政要條舉以聞庚戌諭直省大小官吏保護外僑違者重譴嚴立會仇教之禁犯者問死刑壬子命左都御史張百熙充專使英國大臣甲寅留京大臣奏京師盜風甚熾權用重典允之庚

中賞張佩綸編修隨李鴻章辦交涉壬戌詔復寃陷諸臣立山徐用儀許景澄  
聯元袁昶職再論縱匪肇亂首禍諸臣罪奪載瀾附職與載漪並謫新疆禁錮  
褫剛毅職英年趙舒翹並褫職論斬追褫徐桐李秉衡職啓秀徐承煜褫職聽  
勘董福祥褫職解任癸亥下詔自責以當時委曲苦衷示天下並誡中外諸臣  
激發忠誠去私心破積習力圖振作

二十七年辛丑行在西安春正月戊辰朔詔以救濟順直兵災開實官捐例能  
多倫諾爾歲貢海龍諸皮庚午賜載勛自盡辛未毓賢處斬癸酉英年趙舒翹  
並賜自盡剛毅徐桐李秉衡並論斬以前沒免乙亥啓秀徐承煜處斬庚辰免  
仁和等縣荒廢田糧辛巳免新會貢橙二月己亥撥部帑百萬於山西備賑壬  
子廣東郎中黎國廉等進方物升叙有差三月戊辰免蹕路所過暨被災陝西  
咸甯等處稅糧己巳詔立督辦政務處奕劻李鴻章榮祿崑岡王文韶鹿傳霖  
並爲督理大臣劉坤一張之洞並爲參預甲戌免雲南臨安等處逋糧丁丑論  
拳匪仇教保護不力罪奪己故總督裕祿駐藏大臣慶善原職褫浙江巡撫劉



樹棠職布政使榮銓副都統管昌祺職戍極邊道員鄭文欽知縣白昶都司周之德並處斬餘褫謫有差撥山東漕米五萬石賑直隸災民壬午諭免自京來行在各署司員停補扣資夏四月丁酉賞在京王公百官半俸旗綠營兵丁一月錢糧辛丑命馬玉崑剿近畿餘匪瞿鴻禨在軍機大臣上學習行走丁未命瞿鴻禨兼政務處大臣己酉賑直隸旱災壬子詔開經濟特科命中外舉堪與試者免各省例貢除茶葉藥材及關祭品者一切食物悉罷之癸丑命載灃充德國專使大臣庚申詔從各國議停順天奉天黑龍江直隸山西河南陝西浙江江西湖南諸省考試五年壬戌命張百熙等修京師蹕路癸亥停吉林今歲貢五月乙丑命那桐充日本專使大臣展山西本年恩正兩科鄉試癸未賞道員蔡鈞四品京堂充出使日本大臣甲午賑墨爾根等處災六月丙申命副都統蔭昌充出使德國大臣尋命爲荷蘭兼使賞知府許台身道員充出使韓國大臣庚子萬壽節停朝賀筵宴癸卯詔置外務部以總理各國事務衙門改設之命奕劻總理王文韶爲會辦大臣瞿鴻禨任尙書並會辦大臣徐壽朋聯芳

爲侍郎庚戌各國聯軍去京師壬子發內帑五萬於江西備賑賑棲霞火災秋七月甲子朔命鄧增節制隨扈諸軍免陝西河南直隸蹕路所過地額賦乙丑詔除漕務積弊河運海運並改徵折色在京倉採運收儲世鐸罷直軍機己巳河決章邱惠民己卯詔改科舉自明年始罷時文試帖以經義時務策問試士停武科予羅豐祿三品京堂充出使俄國大臣戊子全權大臣奕劻李鴻章與十一國公使議訂和約十二款成己丑展陝西鄉試於明年舉行壬辰詔永能實官捐例諭各省建武備學堂癸巳諭各省裁兵勇改練常備續備警察等軍八月甲午朔以回鑾有日遣官告祭西嶽中嶽蹕路所經名山大川古帝王陵寢先儒名臣祠墓並由疆吏遣官致祭乙未詔直省立學堂戊申廢內外各署題本除賀本外均改爲奏壬子命盛宣懷爲辦理工商稅大臣癸丑詔以變法圖強示天下並以劉坤一張之洞條奏命各疆吏舉要通籌丁巳車駕發西安己未升允奏臨潼知縣夏良材誤供應請褫職皇太后命從輕議升允自請處分原之九月己酉李鴻章卒贈太傅晉一等侯爵命王文韶署全權大臣袁世凱

署直隸總督兼北洋大臣是秋發帑十五萬賑陝西安徽災留漕款十萬漕米六萬石備安徽江蘇賑又賑兩湖安徽雲南水災江蘇潮災冬十月癸巳朔日有食之甲午次開封惠民決口合龍丙申賞道員張德彝三品卿銜充出使英國大臣旋命兼使義比壬寅皇太后聖壽節停朝賀壬子懿旨撤溥儀皇子名號丙辰詔展會試於癸卯年其明年順天鄉試及癸卯科會試權移河南貢院舉行十一月丙子特予故大學士李鴻章建祠京師戊子命貽穀督晉邊墾務章邱決口合龍庚寅上奉皇太后至自西安辛卯詔以珍妃上年殉節宮中追晉貴妃命翰詹科道及各署司員按日預備召見十二月癸巳朔命王文韶仍督辦路鐵翟鴻禡副之袁世凱督辦關內外鐵路事宜胡燏棻會辦丙申申諭中外臣工重邦交安民教以比匪誤國附和權貴視左副都御史何乃瑩侍講學士彭清藜編修王龍文知府連文冲曾廉職丁酉賑蹕路所過三十里內貧民已亥祀天於圓丘自戊戌年八月至於是月始親詣庚子祭大社大稷遣睿親王魁斌等告祭方澤朝日壇夕月壇恭親王溥偉貝子溥倫詣東西陵告祭

壬寅命袁世凱參預政務處甲辰命鎮國將軍載振充英國專使賀其君加冕  
尋晉貝子銜免蹕路所過河南州縣額賦十之三賑廣西火災辛亥兩宮見各  
國公使於乾清宮免雲南銅廠積年民欠甲寅以瞿鴻禨爲軍機大臣授孫家  
鼎體仁閣大學士乙卯兩宮見各國公使暨其夫人等於養性殿丁巳免山西  
州縣歷年通賦倉穀庚申祫祭太廟辛酉上始復御保和殿筵宴蒙古王公暨  
文武大臣免浙江仁錢等州縣杭嚴嘉湖二衛未墾地畝糧賦

二十八年壬寅春正月庚午享太廟辛未祈穀於上帝癸酉四川提督宋慶卒  
晉封三等男爵丁丑命張翼總辦路礦事宜王文韶瞿鴻禨爲督理呂海寰會  
盛宣懷議商約戊寅罷河東河道總督命各省大吏清釐屯地改屯饌爲丁糧  
撤衛官歸營屯丁連軍並罷諭各省立農工學堂戊子罷詹事府通政使司二  
月壬辰朔命張德彝充日斯巴尼亞專使賀其君加冕癸巳諭各省亟立學堂  
暨武備學堂開館編纂新律甲午廣西游匪戕法兵官剿辦之丁酉釋奠於先  
師戊戌祭大社大稷庚戌劉坤一乞疾慰留三月辛酉朔交收東三省條約成

甲子見義使噶釐納於乾清宮乙丑祀先農親耕藉田丙寅上奉皇太后謁東陵免蹕路所過州縣額賦十之三己巳至庚午謁諸陵甲戌幸南苑駐蹕團河行宮壬午至自東陵癸未皇后祀先蠶是春免宣威昆明及齊齊哈爾墨爾根旗屯災賦免榆林等處逋賦西安等廳縣秋糧十之二夏四月壬辰見俄使雷薩爾於乾清宮甲午常雩祀天丙申命沈家本伍廷芳參訂見行法律戊戌李經羲以陳奏失辭免雲南巡撫下部議壬寅命許珏充出使義國大臣吳德章充出使奧國大臣楊兆璽充出使比國大臣癸卯皇后躬桑甲辰裁銀緞匹顏料三庫罷管庫大臣乙卯免溧平被災地課五月壬戌授袁世凱直隸總督兼北洋大臣免雙城逋賦甲子見各國公使等於樂壽堂丙寅廣西匪陷廣南之販朝雲南官軍擊走之復其城丙子夏至祭地於方澤戊寅見美使康格等於乾清宮六月己丑朔免鶴慶賓川被災雜賦丙申命孫寶琦充出使法國大臣胡維德充出使俄國大臣梁誠充出使美日祕大臣庚戌見美使康格及博覽會長巴禮德於乾清宮辛亥命張之洞爲督辦商務大臣癸丑賑四川南充簡

等屬災秋七月庚午頒行學堂章程八月甲申移雲南迪西道駐騰越兼監督  
關務戊戌袁世凱請裁陋規加公費命他省仿行癸卯河決利津壽張等處已  
酉見德使葛爾士等於仁壽殿庚戌河復決惠民九月癸巳兩江總督劉坤一  
卒追封一等男贈太傅命張之洞署兩江總督兼南洋大臣免天津被兵新舊  
額賦丁酉見法使賈斯那等於仁壽殿甲辰見各國公使於仁壽殿壬子命袁  
世凱充督辦商務大臣伍廷芳副之兼議各國商約是秋發庫帑三十萬續撥  
義賑十二萬並於四川備賑又賑山東廣東雲南福建貴州等屬水災冬十月  
戊子中英商約成己丑湖南都司劉長儒坐不保護教士處斬是月賑山陝各  
屬災雲南劍川鶴慶州新疆疏勒等廳縣俱地震十一月戊午詔自明年會試  
始凡授編檢及改庶常與部屬中書用者皆肄業京師大學堂俟得文憑始許  
散館及奏留分省知縣亦各入課吏館學習己未以有泰爲駐藏大臣辛酉發  
內帑部帑各五萬於山東備賑壬戌調魏光燾爲兩江總督兼南洋大臣丙寅  
免臨潼被水地課五年庚辰冬至祀天於圓丘是月見法使呂班美使康格於

乾清宮十二月癸卯命袁世凱充督辦電務大臣辛亥旌殉親異域使俄大臣楊儒子錫宸孝行是月免江浙各廳州縣衛額賦宜良被水租糧

二十九年癸卯春正月丁巳朔停筵宴以明歲皇太后七旬聖壽詔開慶榜本年爲癸卯恩科鄉試來年爲甲辰恩科會試其正科鄉會試併於下屆舉行乙丑見美使康格等於乾清宮丁卯命榮慶同管大學堂事己巳見各國公使等於養性殿丁亥免鎮西疏附被災糧賦二月壬子惠民決口合龍三月丙辰朔日有食之庚申見德親王亨利公使葛爾士等於乾清宮詔以謁陵取道鐵路禁攤派差徭扈從並免供給辛酉裁官學滿漢總裁及教習癸亥祀先農親耕藉田上奉皇太后謁西陵乙丑幸保定府駐蹕免蹕路所過州縣額賦十之三己巳榮祿卒贈太傅晉一等男罷印花稅及一切苛細雜捐科派侵漁者論如律庚午命奕劻爲軍機大臣癸亥幸南苑甲戌幸團河駐蹕庚辰命奕劻翟鴻禡會戶部整理財政立銀錢鑄造總廠於京師命載振袁世凱伍廷芳參訂商律辛巳至自南苑是月免陝西庚子年通賦夏四月己亥見各國公使於仁壽

殿己酉雲南匪陷臨安府城庚戌免蹕路所過州縣旗租辛亥命崇禮爲東閣大學士敬信協辦大學士五月癸亥命鐵良會袁世凱練京旗兵戊辰戶部火甲戌命楊樞充出使日本大臣乙亥雲南裸夷平壬午賜王壽彭等三百一十五人進士及第出身有差閏五月甲申朔命馮子材會岑春煊辦理廣西軍務丙戌命張之洞會張百熙榮慶釐定大學堂章程庚寅滇軍復臨安府城石屏匪首周雲祥伏誅壬辰自四月不雨至於是日雨丙申廣西巡撫王之春提督蘇元春並視職以柯逢時爲廣西巡撫劉光才爲廣西提督己亥御試經濟特科人員於保和殿壬寅命馬玉崑巡緝近畿盜賊甲辰中英續訂商約成六月壬戌予考取特科袁嘉穀等升叙有差癸亥逮蘇元春下獄丁卯世鐸等請加上皇太后徽號懿旨以廣西兵事方殷民生困苦不許丁丑河決利津是月見日使內田康哉等義使暖轡納等於仁壽殿山東煙台水災賑之秋七月乙酉開廈門鼓浪嶼爲各國公地辛卯賞鄭孝胥四品京堂督辦廣西邊防得專奏崑岡致仕戊戌初置商部以載振爲尙書八月壬子朔王公百官豫請來年皇



太后七旬萬壽報效廉俸申祝懿旨止之癸丑免靈州瀕河地糧丁卯日本商約成庚寅見各國公使於仁壽殿壬申以敬信爲體仁閣大學士裕德協辦大學士丁丑見法使呂班德使穆默於仁壽殿九月丙申命榮慶在軍機大臣上學習行走調那桐爲外務部尙書兼會辦大臣丁酉命那桐與奕劻瞿鴻禨整理戶部財政榮慶充政務處大臣戊戌命孫家鼐張百熙並充政務處大臣是秋賑湖北陝西等屬水災懷柔電災雲南各屬水旱災電災鎮西綏來蝗災凍災十月辛亥朔見荷使希特斯於乾清宮戊午以英秀接收阿勒台借地率議展緩命瑞洵往按之內寅置練兵處命奕劻總理袁世凱鐵良副之甲戌命岑春煊總統廣西諸軍乙亥賞楊晟四品卿銜充出使奧國大臣丙子袁世凱劾張翼擅售開平煤礦暨秦王島口岸於外人詔褫職責令收回丙午諭曰興學育才當務之急據張之洞同管學大臣會訂學章所稱學堂科舉合爲一途俾士皆實學學皆實用令自丙午科始鄉會中額及各省學額逐科遞減俟各省學堂辦齊有效科舉學額分別停止以後均歸學堂考取丁未改管學大臣爲

學務大臣以孫家鼎任之十二月丙辰廣西匪首覃志發等伏誅戊午詔內務府再減宮廷用費罷一切不急工作己巳置翰林學士撰文並增員缺更定品級丙子以日俄構兵中國守局外中立例宣諭臣民己卯授榮慶軍機大臣是月免安州被澇昆明被旱地畝租糧是冬賑甘肅雲南各州縣水災南州新化蛟災瀘州火災

三十年甲辰春正月癸未移廣西鹽道駐梧州兼關監督河決利津王莊甲申見美英法德日義比荷葡各使康格等於乾清宮己丑雲南提督張春發有罪褫職戍軍臺甲午以皇太后七旬聖壽上御太和殿頒詔天下覃恩有差己亥雲南總兵高德元坐玩寇殃民處斬己酉詔停本年秋決二月庚戌朔日有食之己未見葡使白朗穀於乾清宮丙寅利津決口合龍三月庚辰朔見德使穆默等於乾清宮癸未御史蔣式理以疏劾奕劻語無根據責還本官戊子下王照於獄庚寅免榆林等州縣通課丁未張德彝與英訂保工條約成夏四月辛亥見德親王阿拉拜爾公使穆默於乾清宮乙亥蘇元春戍新疆是月免鄧川

上年災糧新化被蛟呼蘭綏化等屬被兵逋賦五月辛巳命道員袁大化辦理安徽鐵務乙酉熱河行宮災丙戌懿旨特赦戊戌黨籍除康有爲梁啟超孫文外褫職者復原銜通緝監禁編管者釋免之戊戌廣西叛勇陷柳城斬統領祖緹武於軍前己亥旌九世同居邢台貢生范鳳儀癸卯賜劉春霖等二百七十三人進士及第出身有差乙巳懿旨本年七旬壽節停筵宴將軍督撫等母來京祝嘏併免進獻能粵海淮安關監督江甯織造六月己酉諭曰時艱民困官吏壅蔽下情不通甚至州縣錢糧浮收中飽以完作欠百弊叢生大負朝廷恤民之意各督撫遠將糧額幾何實徵幾何正耗收米或折色幾何具列簡明表冊此外有無規費一一登明聲叙毋飾毋漏據實奏聞壬子命鐵良往江南考察製造局廠籌畫所宜並察出入款目及各司庫局所利弊戊午趣岑春煊赴桂柳督師癸亥青海住牧盟長車琳端多布等請藉年班齋貢物赴京祝嘏懿旨嘉獎仍卻之癸酉永定河決丙子河決利津薄莊秋七月戊寅見比使葛飛業於乾清宮罷福建水師提督歸併於陸路提督移駐廈門甲申永定河北下

汛復決戊子發內帑十萬賑四川水旱災壬辰英兵入藏境達賴逃視其名號  
命班禪額爾德尼攝之甲午甘肅黃河決皋蘭被災命崧蕃賑濟乙未停九江  
進盜器丙申命李興銳署兩江總督兼南洋大臣是月賞湯壽潛四品卿銜督  
辦浙江鐵路八月丁未朔裁併內務府司員癸亥賞唐紹儀副都統銜往西藏  
查辦事件辛未見義使噶尼納於仁壽殿癸酉見墨使鄺華於乾清宮九月丙  
子朔見英使薩道義於乾清宮癸未敬信以疾免己亥李興銳卒命周馥署兩  
江總督兼南洋大臣以英兵入藏達賴求救命德麟安撫之英兵旋退敕唐紹  
儀爲議約全權大臣癸卯改湖北糧道爲施鶴兵備道是秋免吉林被兵雲南  
水旱兵災通賦武威金州額賦賑雲南順天福建甘肅江西水災山西浙江廣  
東等處災冬十月丙午呂海寰續訂中葡商約成以裕德爲體仁閣大學士世  
續協辦大學士庚戌見奧美德俄比諸使齊幹等於皇極殿永定河決口合龍  
壬子上奉皇太后御仁壽殿賜近支宗藩等宴率王貝子貝勒公等進舞甲寅  
皇太后聖壽節上詣排雲殿進表賀辛酉見英日法韓諸使薩道義等於皇極

殿內寅懿旨禁各省藉新政巧立名目苛細私捐一切學堂工藝有關教養者當官爲勸導紳民自籌毋滋苛擾除浙江墮民籍准入學堂畢業者予出身十一月乙亥朔命蔭昌仍充出使德國大臣曾廣銓充出使韓國大臣四川打箭鎗地震丁丑見義使巴樂禮於乾清宮壬午廣西匪首陸亞發伏誅戊子定新軍官制甲辰諭增祺賑撫東三省難民十二月戊申見義使巴樂禮荷使希特斯荀使阿梅達等於皇極殿甲寅裁江安糧道改江南鹽道爲鹽糧道丁巳發內帑三十萬賑奉天難民壬戌直隸始行公債票丙寅罷漕運總督置江淮巡撫丁卯立貴胄學堂戊辰置黑龍江巡道兼按察使銜蘭綏海兵備道呼蘭綏化二府辛未修四川都江堰是冬裁湖北雲南巡撫湖南陝西糧道免石屏趙州秋糧陳留等州縣逋賦朝邑被水額賦

三十一年乙巳春正月丁丑見德英日本法荷比義日葡墨美韓奧諸使於乾清宮達賴喇嘛請於庫倫建廟諷經不許命仍還藏善撫衆生癸巳鐵良言察閱諸省營伍湖北陸軍爲最優詔嘉獎江南各軍統領懲罰有差命唐紹儀充

出使英國大臣二月乙巳懿旨發內帑三十萬撫恤東三省難民庚戌命長庚徐世昌考驗改編三鎮新軍丙寅景陵恩殿災庚午見美使康格於海晏堂壬申賑阿拉善游牧癸酉免陝西前歲通糧三月乙亥奉天饑俄兵入長春據之丙子巴塘番人焚毀法國教堂駐藏幫辦鳳全剿捕遇伏死飭四川提督馬維祺剿之命柯逢時管理八省土膏統捐事宜丁丑見德親王福禮留伯公使穆默於乾清宮己卯詔督撫舉堪勝提鎮官者己丑雲南省城開商埠庚寅罷新置江淮巡撫改淮揚總兵爲江北提督癸巳諭更定法律死罪至斬決止除凌遲梟首戮屍等刑斬絞決候者以次遞減緣坐各條除知情外餘悉寬免刺字諸例並除之甲午以禁止刑訊變通笞杖清查監獄羈所諭督撫實力奉行乙未健爲匪徒作亂官軍剿平之丙申命周馥往江北籌畫吏治海防河工捕務夏四月甲辰以俄艦至南洋諭所在預防並禁商人運煤接濟更定竊盜條款凡應擬笞杖者改罰工作乙巳諭各省府州縣立罪犯習藝所丙午賞劉永慶侍郎銜署江北提督鎮道以下歸節制丁未裁廣東糧道置廉欽兵備道己

酉命程德全署黑龍江將軍壬子德兵艦突至海州測量飭嚴詰五月丁亥見  
日使賈思理美使柔克義於乾清宮癸巳見墨使胡爾達於皇極殿庚子王文  
韶罷軍機大臣命徐世昌在軍機大臣上學習行走兼政務處大臣鐵良徐世  
昌會辦練兵事六月丙午見俄使璞科第於仁壽殿免中牟等州縣通賦甲寅  
予考試留學生金邦平等進士舉人出身有差命載澤戴鴻慈徐世昌端方往  
東西洋各國考察政治戊午詔置盛京三陵守護大臣裁盛京戶禮兵刑工五  
部侍郎己未以世續爲體仁閣大學士那桐協辦大學士癸亥裁廣東巡撫庚  
午黔匪陷都勻之四寨官軍克復之丙子罷御史巡視五城及街道廳改練勇  
爲巡捕乙酉續派紹英爲出洋考察政治大臣己丑以巴塘兵事開實官捐一  
年丙申賞廷杰侍郎往奉天辦墾荒事務常德湘潭開商埠丁酉命鐵良在軍  
機大臣上學習行走尋兼政務處大臣八月壬寅諭各省工商抵制美約既礙  
邦交亦損商務疆吏當剴切開導以時稽察之甲辰詔廢科舉丙午裁奉天府  
尹府丞改置東三省學政命劉式訓充出使法日大臣黃誥充出使義國大臣

周榮曜充出使比國大臣榮曜旋罷改任李盛鐸丁未免奉天北路被兵額賦  
辛亥發內帑三萬於江蘇備急賑癸丑詔各省學政專司考校學堂嗣後學政  
事宜歸學務大臣考核戊午新疆巡撫潘效蘇坐侵款褫職戍軍台己未命袁  
世凱鐵良校閱新軍秋操壬戌命汪大燮充出使英國大臣楊晟充出使德國  
大臣李經邁充出使奧國大臣甲子開海州商埠乙丑改命李經方爲商約大  
臣丁卯載澤等啟行甫登車匪徒猝擲炸彈事上詔嚴捕重懲己巳巴塘亂平  
匪首刺麻阿澤隆本郎吉等伏誅九月丙子以三品京堂周榮曜舊充關書侵  
盜鉅帑褫職逮治籍其貲庚辰初置巡警部以徐世昌爲尙書庚寅北新倉火  
辛卯諭肅清廣西功晉岑春煊太子少保銜李經羲優叙丙申見德使穆默於  
勤政殿戊戌命尙其亨李盛鐸會同載澤等赴各國考察政治是秋賑貴州雲  
南各屬水災太康風災鎮番暨巴燕戎格電災風災冬十月癸卯見日本公使  
內田康哉等於勤政殿置吉林哈爾濱道丙辰蘆漢鐵路成英兵入藏索賠款  
一百二十餘萬諭國家代給以恤番艱壬戌訂鑄造銀幣及行用章程乙丑以



陸徵祥充出使荷國大臣兼理海牙和平會事戊辰置考察政治館擇各國政法宜於中國治體者斟酌損益纂訂成書取旨裁定詔近有不逞之徒造爲革命排滿之說假借黨派陰行叛逆各疆臣應嚴禁密緝首從各犯論如謀逆例十一月庚午朔陝洛會匪平辛未裕德卒丙子罷駐韓使臣改置總領事己卯詔置學部以國子監歸併之調榮慶爲尙書乙未中日新約成十二月辛亥授那桐體仁閣大學士榮慶協辦大學士癸亥置京師內外城巡警總廳罷工巡局命徐世昌鐵良並爲軍機大臣是月免盛京各旗陝西各屬被兵通賦安州積澇韓城水冲地租是冬賑會澤潞災荊州水災英吉沙爾水災雹災

三十二年丙午春正月丙子綏布特哈貢貂丁丑見德英法美日本荷義俄奧比葡墨諸使穆默等於乾清宮丁亥漳浦匪首張嬰伏誅壬辰徐卬以察典罷甲午命瞿鴻禨協辦大學士二月戊辰詔各省保護教堂及外人身家乙丑見德使穆默等於勤政殿是月頒帑十萬助賑日本災三月戊辰朔以忠君尊孔尙公尙武尙實五大綱爲教育宗旨宣詔天下庚午罷選八旗秀女丙子命汪

大變往賀日君婚禮內戊開江蘇通州商埠丁酉美國舊金山地震頒帑十萬賑華民是月與使顧新斯基義使巴樂禮等德使穆默等法使呂班先後覲見是春免浙江仁和等場與各州縣杭嚴衢三所鹽課及荒地山塘雜課雲南湖南新縣災糧陝西通賦夏四月戊戌朔命陸徵祥往瑞士議紅十字會公約己亥裁各省學政改置提學使庚子見日本公使內田康哉於勤政殿癸丑命鐵良充督辦稅務大臣唐紹儀副之丁巳發湖南庫帑十萬賑水災閏四月丙戌以陽雨失時偏災屢告懿旨飭君臣上下交儆戊子唐炯以衰疾解雲南鑛務五月戊戌發庫帑五萬賑廣東水滂災癸卯河南沁河溢賑災民是月見法使巴思德義親王費爾迪安德等於乾清宮六月丁卯德國減直隸駐兵歸我郎坊楊村北戴河秦王島山海關地庚辰沅陵匪首覃加位伏誅是夏免浪穹舊通沙車復荒額賦甘肅雲南被災通賦賑武陟水災朝陽火災秋七月戊戌置川滇邊務大臣以趙爾豐任之賞侍郎銜沁河決口合龍庚子江蘇水陸各營旗防軍改編巡防隊辛丑考察政治大臣載澤等還京上封事命醇親王軍機

政務處大臣大學士北洋大臣公閱取進止乙巳奉天開商埠大東溝置海關以東邊道兼監督戊申諭曰載澤等陳奏謂國勢不振由上下相睽內外隔閡官不知所以保民民不知所以衛國而各國所由富強在實行憲法取決公論時處今日惟有仿行憲政大權統於朝廷庶政公諸輿論預備立憲基礎內外臣工切實振興俟數年後規模粗具參用各國成法再定期限實行己酉諭立憲預備須先釐定官制命大臣編纂奕劻孫家鼐瞿鴻禨總司核定取旨遵行調端方爲兩江總督兼南洋大臣甲子發江蘇庫儲十萬賑徐海淮西水災八月丁亥除臨川水冲地額賦庚寅見日本王爵博恭公使林權助於仁壽殿是月賑安徽水災廣東風災湖州滂災九月癸卯見各國公使等於仁壽殿丙午賜游學畢業陳錦濤等各科進士舉人出身有差甲寅詔更定官制內閣軍機處外務吏禮學部宗人府翰林院等仍舊改巡警部爲民政部戶部爲財政部兵部爲陸軍部刑部爲法部工部併入商部爲農工商部理藩院爲理藩部各設尙書一人侍郎二人不分滿漢都察院都御史一人副都御史二人改六科

給事中爲給事中大理寺爲大理院增設郵傳部海軍部軍諮府資政院審計院以財政處歸度支部太常光祿鴻臚三寺歸禮部太僕寺練兵處歸陸軍部各部尙書俱充參預政務處大臣命世續爲軍機大臣林紹年軍機大臣上學習行走鹿傳霖榮慶徐世昌鐵良並罷軍機專理部務乙卯發廣東庫儲十萬賑香港及潮高雷欽廉屬風災丁巳改政務處爲會議政務處戊午命曾廣銓以三品京堂充出使德國大臣冬十月癸酉皇太后聖壽節停筵宴癸未見英使朱邇典比使柯覓雅於乾清宮乙酉裁併廣東陸路水路提督爲廣東提督丁亥見日本公使林權助等於勤政殿戊子瀏陽醴陵匪首王永求陳顯龍倡亂官軍擒斬之己丑撥漕折三十萬備賑江蘇辛卯立官報局於京師十一月己亥留廣東京餉十萬備賑壬寅免廣西錦鏡出井稅甲辰撥陝西官帑八萬助賑江蘇戊申詔升孔子爲大祀所司議典禮以聞癸丑詔各省議幣制丁卯建曲阜學堂發內帑十萬濟工是月見墨使胡爾達於勤政殿德使雷克司法使巴思德英使朱邇典於乾清宮十二月癸亥朔日有食之丁卯加京官養廉

甲戌改駐各國公使爲二品實官是冬賑普甯趙州羅平師宗災江甯揚州水災免漕平安州澇災糧賦永城額賦陝西咸甯等處通賦永平太和昆明災地欠糧

三十三年丁未春正月甲辰見各國公使於乾清宮庚戌裁各部小京官二月甲子有泰以貽誤藏事褫職謫戍軍臺壬申留蘇漕十五萬備賑三月丙申見日本公使林權助等於勤政殿戊戌長春哈爾濱開商埠己亥改盛京將軍爲東三省總督裁吉林黑龍江將軍改置奉吉黑三巡撫授徐世昌欽差大臣爲東三省總督壬寅命府尹孫寶琦充出使德國大臣壬子命天津道梁敦彥充出使美墨秘古大臣丙申命陸徵祥充保和會專使大臣李經方充出使英國大臣錢恂充出使荷國大臣丁巳崑岡卒是春免中衛被水及榆林等屬通賦雲南旱災等州縣通糧及額賦四月甲子裁各省民壯捕役改設巡警綏來地震乙丑御史趙啟霖坐污蔑親貴褫職辛未更定東三省官制奉天吉林黑龍江各設行省公署以總督爲長官巡撫爲次官置左右參贊分領承宣諮議兩

廳分設交涉旗務民政提學度支勸業蒙務七司各置司使及提法使督練處等官己卯祈雨辛巳以江北水災嚴米糧出口禁丁亥定陸海軍官制陸軍部設兩廳十司軍諮處五司海軍部六司戊子命衍聖公孔令貽稽察山東學務五月癸巳巴塘等屬喇嘛脅河西蠻作亂官軍討平之乙未命王士珍以侍郎銜署江北提督丙申西陵禁山火丁酉翟鴻禩罷己亥授鹿傳霖軍機大臣命醇親王直軍機辛丑王文韶罷命張之洞協辦大學士癸卯崇禮卒丁巳改按察使爲提法使置巡警勸業道裁分守分巡各道酌留兵備道及分設審判廳備司法獨立增易佐治員備地方自治期十五年內通行戊午詔憲法官民均有責任凡知所以預備之方施行之序者許各條舉主者甄採以聞安徽候補道徐錫麟刺殺巡撫恩銘錫麟捕得伏誅六月辛酉命李家駒充出使日本大臣丙寅復御史趙啟霖官壬申自四月不雨至於是日雨授張之洞體仁閣大學士鹿傳霖協辦大學士乙酉停萬壽筵宴永定河決是夏免新化被水額賦伊通被賊述課雲南旱災等州縣銀米賑雲南饑及直隸水災秋七月詔中外

臣上議化除滿漢甲午改考查政治館爲憲政編查館其軍機大臣大學士參預政務大臣會議事於內閣行之壬寅懿旨遣楊士琦赴南洋各埠考察獎勵華僑免趙州祿豐被災額賦賑順天等屬災民及瀏陽邵陽蛟災甲辰詔以匪徒謀逆往往假革命名詞巧爲煽誘各督撫當設法解散獲犯擬罪分別叛逆盜匪科論被脅及家屬不知情者勿株連命張蔭棠爲全權大臣與英人議藏約敬信卒己酉定限年編練陸軍三十六鎮丙辰命張之洞袁世凱並爲軍機大臣以袁世凱爲外務部尙書丁巳命楊士驤署直隸總督兼北洋大臣戊午李經邁以母病免命雷補同充出使奧國大臣己未河決孟縣八月辛酉上不豫詔各省薦精通醫理者命汪大燮使英國達壽使日本于式枚使德國俱充考察憲政大臣壬戌置京師高等審判廳己巳置總檢察廳庚申立資政院以貝子溥倫孫家鼐爲總裁乙亥命伍廷芳充出使美國大臣薩蔭圖充出使俄國大臣己卯詔以各省駐防習爲游惰命各將軍等授田督耕歸農後一切歸有司治理庚辰裁奉天驛站設文報局壬午詔中外臣工研究君主立憲政體

諭定自治章程甲辰見德使雷克司日使阿部守太郎於仁壽殿諭神機營衛隊及官兵歸陸軍部管轄九月辛卯詔議定滿漢禮制刑律考定度量權衡畫一制度章程是日以烟習未除勅責莊王載功睿王魁斌都御史陸寶忠副都御史陳名侃解職迅速戒斷並諭内外文武限三月淨盡否則嚴懲癸巳命沈家本俞廉三英瑞充修訂法律大臣己亥命各省立諮議局公舉議員並籌設州縣議事會壬寅日本以水災來告糴輸江皖浙鄂諸省米糧六十萬石濟之甲辰命各省立調查局各部院設統計處予游學畢業生章宗元等進士舉人出身有差戊申湖北按察使梁鼎芬言挽回時局莫亟於禁賄賂絕請託劾奕劻袁世凱等貪緣比附貪私誤國廷旨以有意沽名斥之是月免雲南旱傷等州縣稅糧賑懷甯等縣水災冬十月乙丑命派孫家鼐榮慶陸潤庠張英麟唐景崇寶熙朱益藩進講經史及國朝掌故永定河合龍戊辰皇太后聖壽停筵宴壬申見日使林權助等於勤政殿丙戌哲布尊巴丹胡圖克圖進方物十一月庚寅廣西匪踞南關礮臺責張鳴岐督剿尋復之戊申嚴聚衆開會演說之



禁諭各省整頓學堂增訂考核勸戒法壬子見俄使璞科第等於乾清宮以內  
外臣工條議幣制用兩元互有利害諭各督撫體察籌議以聞發帑五十萬  
濟廣西軍十二月戊午朔復分置廣東陸路提督水師提督癸亥裁吉林副都  
統置交涉民政度支三司使暨提法使勸業道予進士館游學畢業學員楊兆  
麟等進叙有差壬申裁山東糧道置巡警勸業二道甲戌諭熱河圍場辦屯墾  
裁駐防官兵乙亥命呂海寰充督辦津浦鐵路大臣丙子那桐兼督辦稅務大  
臣辛巳賞總稅務司赫德尙書銜丙戌再停布特哈貢貂一年是冬免雲南被  
旱直隸被潦暨陝西通賦賑雲南等屬蛟災四川水災廣東風災水災

三十四年戊申春正月丁亥朔授醕親王載灃爲軍機大臣庚寅見各國公使  
於乾清宮己亥以京師銀價驟高物直踊貴發帑五十萬命順天府尹貶價收  
錢並令各省廠鑄當十銅元定額外加鑄三成一文新錢以資補救甲寅建蘭  
州黃河鐵橋丙午見奧使顧新斯基於勤政殿是月免雲南昆明等縣通賦浙  
江仁和等場筴課湖南邵陽額賦二月戊午祭大社大稷是後祀典不克親行

皆遣代庚申賞趙爾豐尙書銜爲駐藏大臣仍兼邊務大臣癸亥詔增給滿大臣暨各旗官十成養廉更定御前大臣以下等員津貼內寅諭京外清庶獄甲戌京師勸工陳列所災癸酉諭以禁烟議成英人許分年減運見已實行遞減相約試行三年限滿再爲推減轉瞬期至其何以答友邦民政度支二部迅訂稽核章程責成督撫飭屬將減種減食切實舉辦以聞丁丑召達壽還命李家駒爲考察憲政大臣胡惟德充出使日本大臣壬午黃誥罷調錢恂爲出使義國大臣以陸徵祥爲出使荷國大臣三月壬辰命恭親王溥偉鹿傳霖景星丁振鐸充禁烟大臣立戒烟所專司查驗丙午廓爾喀貢方物甲寅以湛深經術賜湘潭舉人王閻運檢討是月免雲南被災新舊額賦夏四月丙辰見日使林權助等於勤政殿綏遠城將軍貽穀有罪褫職逮下刑部獄尋籍其家命信勤充掣務大臣兼署綏遠城將軍丁巳裁安徽安廬滁和道已未越匪陷河口命劉春霖以三品京堂幫辦雲南邊防前敵諸軍歸節制戊辰裁貴州糧道貴西道已巳見各國公使希特斯等於仁壽殿賜宴庚辰雲南官軍敗匪於田房復

四隘旋克大小南溪及河口發帑犒軍五月乙酉朔滇匪平丁亥裁巴塘裏塘  
上司置流官王辰上疾復作命直省薦精通醫理者癸巳錄中興功臣多隆阿  
向榮江忠源羅澤南駱秉章張國樞李續賓彭玉璣楊岳斌鮑超李孟羣程學  
啟劉松山馮子材等後升敘有差甲午修曲阜孔子廟癸卯襄河決颶風爲災  
庚戌郎中曹元弼進所著禮經校釋賞編修癸丑廣東大雨東西北三江並溢  
衝決同隄六月丁巳前祭酒王先謙進所著尙書孔傳參正漢書補注荀子集  
解日本源流考賞內閣學士銜甲子免廣西鑛地出井出口兩稅五年庚午予  
進士館遊學畢業學員黎湛枝等進叙有差甲戌命張之洞兼督辦粵漢鐵路  
乙亥允達賴喇嘛入覲丙子以美國減收賠款命唐紹儀充專使致謝兼赴東  
西洋考察財政議免釐加稅乙卯授楊士驤直隸總督兼北洋大臣辛巳法部  
主事陳景仁等請三年後開國會詔以景仁倡率生事褫職交管束是夏免雲  
南水旱雹災奉天水災荒地額賦賑江蘇風雹災湖北水災發部帑五萬賑察  
哈爾蒙旗及兩翼牧羣災又部帑十萬賑廣東廣州肇慶陽江各屬水災秋七

月壬辰裁黑龍江愛琿等三副都統增置愛琿道呼倫貝爾道內申釋蘇元春回己亥免鐵路公私稅三年庚子以各省設政聞社斂財結黨陰擾治安諭所在嚴禁辛丑修浙江海塘癸卯廣西巡勇叛變戕殺統將張人駿督剿之內午命三品卿銜胡國廉總理瓊崖墾礦事庚戌置雲南交涉使是月山東安徽蝗八月甲寅朔憲政編查館資政院上憲法議院選舉各綱要暨逐年籌備事宜詔頒行京外官署依限舉辦每六閱月臚列成績以聞辛未命姜桂題總統武衛左軍戊寅見俄使廓索維慈荷使希特斯等於仁壽殿己卯命蔭昌端方校閱秋操庚辰馬玉崑卒晉二等輕車都尉辛巳命蔭昌充出使德國大臣壬午遣御前大臣博迪蘇往保定迎勞達賴喇嘛九月癸未朔予先儒顧炎武王夫之黃宗義從祀文廟乙酉美軍艦游歷至廈門遣貝勒毓朗梁敦彥往勞問己丑開甯夏渠墾田庚寅達賴喇嘛至京尋於仁壽殿覲見癸巳頒畫一幣制丙申允郵傳部請試辦本國公債戊戌予進士館畢業陳雲誥等叙進有差庚子見英使朱邇典等於仁壽殿癸卯予游學畢業陳振先等出身進士館畢業葉

先圻等叙進各有差己酉裁四川成縣龍茂道增置巡警勸業兩道辛亥詔以前籌備憲政事宜尙有未盡諭各部院依前格式各就職司所繫分期臚列奏交編查館覆核取旨遵行是秋免雲南會澤被水通賦楚雄等縣及湖南溆浦被水額糧發帑十萬賑湖北湖南災民復賑甘肅災廣東風災水災廣西浙江黑龍江福建水災冬十月甲寅見日使伊集院彥吉於勤政殿廣州肇慶等屬颶風爲災諭施急賑戊午賜達賴宴於紫光閣壬戌皇太后聖壽節停筵宴達賴祝嘏進方物懿旨加封誠順贊化西天大善自在佛歲賜廩餼萬金遣歸藏壬申上疾甚懿旨醕親王載灃之子溥儀在宮中教養復命載灃監國爲攝政王癸酉上疾大漸崩於瀛臺涵元殿年三十有八遺詔攝政王載灃子溥儀入承大統爲嗣皇帝皇太后懿旨命嗣皇帝承繼穆宗爲嗣兼承大行皇帝之祧宣統元年正月己酉上尊諡曰同天崇運大中至正經文緯武仁孝睿智端儉寬勤景皇帝廟號德宗葬崇陵

論曰德宗親政之時春秋方富抱大有爲之志欲張撻伐以滿國恥已而師徒

撓敗割地輸平遂引新進小臣銳意更張爲發奮自強之計然功名之士險躁  
自矜忘投鼠之忌而弗恤其罔濟言之可爲於邑洎垂簾再出韶晦瀛臺外侮  
之來釁自內作卒使八國連兵六龍西狩庚子以後佛鬱摧傷奄致殂落而國  
運亦因此而傾矣嗚呼豈非天哉

清史稿

本紀二十五

宣統皇帝本紀

宣統皇帝名溥儀宣宗之曾孫醇賢親王奕譞之孫監國攝政王載灃之子也於德宗爲本生弟子母攝政王嫡福晉蘇完瓜爾佳氏光緒三十二年春正月十四日誕於醇邸三十四年冬十月壬申德宗疾大漸太皇太后命教養宮內癸酉德宗崩奉太皇太后懿旨入承大統爲嗣皇帝嗣穆宗兼承大行皇帝之祧時年三歲攝政王載灃奉太皇太后懿旨監國軍國機務中外章奏悉取攝政王處分稱詔行之大事並請皇太后懿旨詔行三年喪甲戌尊聖祖母慈禧端佑康頤昭豫莊誠壽恭欽獻崇熙皇太后爲太皇太后兼祧母后皇后爲皇太后先是太皇太后並亦達豫是日崩乙亥申嚴門禁丁丑尊封文宗祺貴妃爲祺皇貴太妃穆宗瑜貴妃爲瑜皇貴妃珣貴妃爲珣皇貴妃璿妃爲璿貴妃大行皇帝瑾妃爲瑾貴妃戊寅停各省進方物己卯誥誡羣臣詔曰軍國政事由監國攝政王裁定爲大行太皇太后懿旨自朕以下一體服從嗣後王公百

官儼有觀望玩違或越禮犯分變更典章淆亂國是定即治以國法庶無負大行太皇太后委寄之重而慰天下臣民之望庚辰頒大行皇帝遺詔安慶兵變剿定之十一月乙酉頒大行太皇太后遺詔詔四時祭饗祝版醇賢親王稱曰本生祖考醇賢親王嫡福晉稱曰本生祖妣醇賢親王嫡福晉賑湖南澧州等屬水災戊子皇太后懿旨皇帝萬壽節俟釋服後改於每年正月十三日舉行慶賀禮庚寅以即位前期告祭天地宗廟社稷先師孔子告祭大行太皇太后大行皇帝几筵辛卯帝即位於太和殿以明年爲宣統元年頒詔天下罪非常所不原者咸赦除之詔遵大行太皇太后懿旨仍定於第九年內宣統八年頒布憲法召集議員鑄宣統錢己亥頒中和位育扁額於文廟壬寅內閣等衙門會奏監國攝政王禮節總目詔宣布之定守衛門禁章程命貝勒載瀅毓朗尙書鐵良總司稽察以副都統崑源管理察哈爾牧羣定軍機處領班章京爲從三品官幫領班章京爲從四品官福建龍溪南靖等縣水災發帑銀四萬兩賑之乙巳詔各省督撫督率司道攷察屬吏秉公甄別不肖守令罔恤民瘼者重



治之立變通旗制處命貝子溥倫鎮國公載澤那桐寶熙熙彥達壽總其事諭  
內外臣工尙節儉戒浮華丙午遣官告祭孔子闕里歷代帝王陵寢五嶽四瀆  
戊申皇太后懿旨罷頤和園臨幸加恩慶親王奕劻以親王世襲罔替貝勒載  
洵載濤加郡王銜皇太后父公桂祥食雙俸大學士以次錫賚有差辛亥冬至  
祀天於圓丘莊親王載功代行禮自是壇廟大祀皆攝十二月壬子朔加上穆  
宗毅皇帝孝靜成皇后孝德顯皇后孝貞顯皇后孝哲毅皇后尊諡頒宣統元  
年時憲書甲寅立禁衛軍命貝勒載濤毓朗尙書鐵良專司訓練裁湖南鎮溪  
營游擊乾州協守備減留乾州協各營兵旌殉節故直隸提督馬玉崑妾于氏  
賑黑龍江墨爾根布特哈黑水大賚等城廳水災免直隸河間等八州縣被災  
地畝糧租丁巳祈雪命張之洞兼督辦川漢鐵路大臣庚申致仕大學士王文  
韶卒贈太保追予故雲貴總督張亮基諡民政部上調查戶口章程表式壬戌  
袁世凱罷命大學士那桐爲軍機大臣癸亥以梁敦彥爲外務部尙書兼會辦  
大臣那桐免步軍統領以毓朗代之乙丑詔定西陵金龍峪爲德宗景皇帝山

陵稱曰崇陵丁卯復祈雪已巳度支部上清理財政章程壬申命張勳所部准軍仍駐東省辦理剿撫事宜癸酉義大利地震災出帑銀五萬兩助賑憲政編查館奏京旗初選複選事宜應歸順天府辦理乙亥諭各省清蠲緩錢糧積弊丁丑復祈雪是日雪免陝西各州縣光緒三十二年逋賦戊寅又雪憲政編查館上核覆城鄉地方自治並另擬選舉章程詔頒行之始製寶星賜外務部總理會辦大臣及出使各國大臣庚辰設奉天各級審判廳檢察廳辛巳裁江西督糧道設巡警勸業兩道

宣統元年己酉春正月壬午朔以大行在殯不受朝賀癸未免江蘇長洲等二十八廳州縣荒廢田地暨昭文金壇丹徒崑山新陽靖江溧陽等七縣漕屯銀米戊子置呼倫貝爾沿邊卡倫庚寅欽差大臣東三省總督徐世昌以病請免不許辛卯皇太后聖壽節停筵宴不受賀甲午免雲南阿迷州被災逋賦乙未度支部奏改定幣制請仍飭會議下政務處覆議開廣西富川縣錫鑛丁酉禁置買奴婢戊戌以近年新設衙門新建省分調用人員請加經費不能綜覈名

實命中外切實考覈裁汰毋漫無限制美利堅國開萬國禁煙會議於江蘇上海端方莅會乙亥陳璧被劾罷以徐世昌爲郵傳部尙書調錫良爲欽差大臣東三省總督兼管三省將軍事以李經羲爲雲貴總督壬寅命雲南交涉使高而謙赴澳門勘界民政部上整頓京師內外警政酌改廳區章程癸卯上大行太皇太后尊諡翼日頒詔天下戊申詔籌備立憲事宜本年各省應行各節依限成立不得延誤諭核定新刑律來年頒行復已革廣西提督蘇元春原官罷福建廈門貢燕己酉上大行皇帝尊諡廟號翼日頒詔天下庚戌重整海軍命肅親王善耆鎮國公載澤尙書鐵良提督薩鎮冰籌畫慶親王奕劻總司稽查龍鐵良專司訓練禁衛軍大臣二月壬子修德宗實錄癸丑諭京外問刑衙門清訟獄釐剔弊端戊午農工商部奏和蘭將訂新律收華僑入籍請定國籍法下修訂法律大臣會外務部議庚申免浙江仁和等場鹽課錢糧乙丑宣示實行預備立憲宗旨詔曰國是已定期在必成內外大小臣工皆當共體此意翊贊新猷言責諸臣亦應於一切新政得失利病剴切敷陳丁卯命熙彥喬樹相

劉廷琛吳士鑑周自齊勞乃宣趙炳麟譚學衡與榮慶陸潤庠張英麟唐景崇  
寶熙朱益藩分日進講講義令孫家鼎張之洞核定庚午憲政編查館上統計  
表式甲戌申鴉片烟禁丙子免雲南宣威州被災村莊銀米閏二月甲申詔嚴  
預備立憲責成戒部臣疆臣因循敷衍放棄責任以服制倫紀攸關詔自今內  
外遭父母喪者滿漢皆離任聽終制命前內閣學士陳寶琛總理禮學館免浙  
江仁和等三十二州縣並杭嚴二衛杭衢嚴三所荒廢田地山塘丁漕銀米丙  
戌軍機大臣大學士那桐丁母憂詔奪情百日孝滿改署任仍入直戊子置庫  
倫理刑司員免廣東新鑛井口稅予死事安徽礦管管帶官陳昌鏞優卹辛卯  
監國攝政王班見王公百官於文華殿增設海參崴總領事頒行度支部印花  
票稅置直省財政監理官內申裁湖北黃州荊門鄖陽宜昌施南德安副將參  
將游擊都司中軍守備各官出使大臣伍廷芳與美國訂立公斷專約成丁酉  
修崇陵戊戌立法政貴胄學堂命貝勒毓朗總理乙巳旌賞年逾百歲甘肅固  
原州回民李生潮賜御書匾額己酉以大行在殯止年班內外札薩克蒙古汗

王貝勒貝子公台吉塔布囊等及呼圖克圖喇嘛西藏堪布察木多帕克巴拉  
回子伯克土司土舍廓爾喀等母來京三月辛亥增設浙江巡警道勸業道甲  
寅復前河南巡撫李鶴年原官庚申皇太后懿旨度支部每歲交進年節另款  
銀二十八萬兩自今停進辛酉奉移德宗景皇帝梓宮於西陵梁格莊行宮甲  
子以輪船招商局歸郵傳部管轄乙丑復裁奉天巡警道增設洮昌等處兵備  
道臨長海等處分巡兵備道改奉錦山海關道爲錦新等處兵備道兼山海關  
監督東邊道爲興奉等處兵備道升興京廳爲興京府丙寅免梓宮經過宛平  
良鄉涿州房山涞水五州縣本年額賦十分之五易州十分之七並賞民間平  
毀麥田銀每畝一錢己巳詔復前戶部尙書立山兵部尙書徐用儀吏部左侍  
郎許景澄內閣學士聯元太常寺卿袁昶原官並賜諡命陸軍協都統吳祿貞  
督辦吉林邊務裁山西雁平道辛未以前外務部左參議楊樞充出使比國大  
臣亞東江孜噶大克開埠設關丙子增置奉天輝南直隸廳戊寅四川總督趙  
爾巽駐藏大臣趙爾豐助欸興學下部優敘趙爾巽捐廉贍族賞御書誥篤宗

親區額夏四月庚辰以各國遣使來弔命貝子銜鎮國將軍載振使日本法部  
尙書戴鴻慈使俄羅斯報謝他國命駐使將事甲申度支部立幣制調查局鑄  
通行銀幣乙酉普免光緒十四年訖光緒三十三年直省通賦癸巳裁吉林琿  
春三姓寧古塔伯都訥阿勒楚喀各城副都統置琿春兵備道三姓兵備道升  
改增置綏芬延吉五常雙城賓州臨江諸府伊通直隸州榆樹直隸廳寶清綏  
遠二州琿春濱江東寧三廳富錦穆稜和龍樺川臨湖旺清額穆諸縣尋復設  
舒蘭阿城勃利饒河四縣甲午命內閣部院翰林科道會議德宗升祔大禮乙  
未祈雨丙申甘肅蘭州涼州鞏昌碾伯會審各屬災發帑銀六萬兩賑之壬寅  
裁奉天左右參贊承宣諮議兩廳甲辰復祈雨戊申諭禁烟大臣切實考驗毋  
許瞻徇敷衍外省文武職官學生責成督撫將軍都統等嚴查禁五月己酉朔  
日有食之辛亥廷試游學畢業生進士黃德章等一百二十人授官有差壬子  
于式枚言各省諮議局章程與普魯士國地方議會制度不符下憲政編查館  
妥議癸丑陳啓泰卒以瑞澂爲江蘇巡撫允浙江紳士爲故兵部尙書徐用儀

吏部右侍郎許景澄太常寺卿袁昶於浙江西湖立祠甲寅復祈雨陝甘總督升允以疏陳立憲利弊能以長庚代之乙卯命廣福署伊犁將軍丁巳聯豫溫宗堯奏陳西藏籌辦練兵興學事宜己未命世續署外務部會辦大臣楊士驤卒以端方爲直隸總督兼辦理通商事務大臣張人駿爲兩江總督兼辦理通商事務大臣孫寶琦署山東巡撫辛酉以乍丫地方曩屬四川命畫歸邊務大臣管轄甲子諭農工商部趣各省興舉農林工藝各政乙丑復祈雨是日雨戊辰復前協辦大學士戶部尙書翁同龢原官己巳唐紹怡免奉天巡撫以待郎候補辛未立游美學務處癸酉河南省改編營制甲戌賑雲南南甯州地震災丙子詔立軍諮處以貝勒毓朗領之攝政王代爲統率陸海軍大元帥貝勒載洵提督薩鎮冰俱充籌辦海軍大臣賑湖南澧州水災丁丑命貝勒載濤管理軍諮處事務六月甲申慶親王奕劻免管理陸軍部事賑湖北漢陽等府水災乙酉伊犁始編練陸軍丙戌授程德全奉天巡撫陳昭常吉林巡撫周樹模黑龍江巡撫丁亥開甘肅臯蘭縣新城西固城渠以工代賑己丑賑雲南彌勒縣

督河等處地震災免雲南太和縣屬上年被災田糧庚寅復已故降調兩廣總督毛鴻賓原官追予禦賊殉難已故江蘇常州府通判岳昌於常州府建祠賑奉天安東水災甲午呂海寰罷以徐世昌充督辦津浦鐵路大臣沈雲沛副之更奉天錦新道名錦新營口等處分巡兵備道乙未吉林大水發帑銀六萬兩賑之賑湖南澧州安鄉常德岳州等廳州縣水災丁酉湖北荊州漢陽兩府潦發帑銀六萬兩並命籌銀二十萬兩急賑之辛丑除熱河新軍營房占用圈地額租壬寅賑浙江錢塘等十一縣水災癸卯罷張勳東三省行營翼長命赴甘肅提督任甲辰命伍廷芳錢恂俱來京以署外務部右丞張蔭棠爲出使美墨秘古四國大臣署外務部右參議吳宗濂爲出使義國大臣甲辰趙爾巽奏平四川寧遠淺水獮夷乙巳賞京師貧民棉衣銀後以爲常丙午命李準爲廣東水師提督秋七月戊申朔裁湖南常德寶慶永順岳州澧州臨武桂陽宜奉永州武岡沅州綏靖辰州嶺東各協營暨撫標提標副將參將游擊都司守備等官癸丑浚遼河丙辰籌辦海軍大臣上擬訂海軍長官旗式章服圖說管理軍



諮處上酌擬軍諮處暫行章程賑江西萍鄉等縣水災丁巳停秋決法部上補訂高等各級審判廳試辦章程及擬定外省審判廳編制大綱開四川重慶江北廳龍王洞煤鐵鑛戊午免雲南魯甸鎮雄二廳被災田畝銀米甲申南洋籌設勸業會命南洋大臣兩江總督張人駿爲會長各省籌辦協會出品免稅釐辛酉德宗景皇帝梓宮奉移山陵免所過各州縣旗租並賞籽種銀甲子裁河南糧鹽道增置巡警勸業二道戊辰諭直省整飭積穀卹以死建言頤和園八品苑副永麟庚午增設南洋各島領事壬申學部立圖書館於京師洪江會匪姚芒山伏誅丙子湖北平糶八月丁丑朔考察憲政大臣李家駒進日本司法制度考等書辛巳開黑龍江墨爾根嫩江甘河煤鑛甲申改吉林濱江道爲西北路道西路道爲西南路道並前設之東北路道東南路道俱名分巡兵備道乙酉賑福建福州風災熱河開魯平泉兩州縣水災丙戌藏番不靖趙爾豐剿定之命候補內閣學士李家駒協理資政院事戊子京張鐵路工成除浙江鎮海縣開浚河道乞廢民墾田地銀米己丑開湖南平江金鑛新化錦鑛常寧鉛

鑛庚寅子教父捐軀湖北黃陂縣舉人陳鴻偉孝行宣付史館丁酉大學士孫家鼎張之洞並以病乞休詔慰留之戊戌農工商部奏試行勸業當籤公債票己亥大學士張之洞卒贈太保入祀賢良祠命戴鴻慈在軍機大臣上學習行走以廷杰爲法部尙書葛寶華爲禮部尙書庚子調誠勳爲熱河都統以溥良爲察哈爾都統癸卯京師開廠煮粥濟貧民發粟二千五百石有奇已改設教養局習藝所者仍給之歲以爲常乙巳修訂法律大臣進編訂現行刑律下憲政編查館核議內午詔以九月初一日爲各省召集議員開議之期特申誥諭曰諮議局議員於地方利弊當切實指陳妥善計畫勿挾私心以妨公益勿逞意氣以紊成規勿見事太易而議論稍涉囂張勿權限不明而定法或滋侵越各督撫亦當虛心採納裁度施行以期上下一心漸臻上理至開局以後各督撫尤應遵照定章實行監督務使議決事件不稍踰越權限違背法律共體忠愛以圖富強朕實有厚望焉是月載洵薩鎮冰出洋考查海軍九月丁未朔始製爵章頒賜辛亥和蘭保和會條約成分別批准畫押癸丑命趙爾巽兼署

成都將軍乙卯內閣會奏德宗升祔大禮詔穆宗毅皇帝德宗景皇帝同爲百世不祧之廟宜以昭穆分左右不以昭穆分尊卑定德宗升祔太廟中殿供奉西又次楹又五室穆位前殿於文宗顯皇帝之次恭設坐西東向穆位奉先殿準此永爲定制賞陸軍貴冑學堂畢業學生子爵成全等侍衛及進叙有差己未資政院上選舉章程壬戌德人遊歷雲南爲傣夷所害捕誅之甲子豫河安瀾賑廣東省城及南海各縣水災乙丑錫林果勒盟阿巴嘎阿巴哈那爾浩齊特烏珠穆沁災發帑銀三萬兩賑之賑雲南鎮雄等州縣水災丙寅黃河安瀾授鹿傳霖體仁閣大學士吏部尙書陸潤庠協辦大學士賞游學畢業生項駿等舉人辛未升翰林院侍講學士爲正四品侍讀侍講從四品撰文祕書郎修撰正五品編修檢討從五品頒爪哇僑民捐立學堂扁額癸酉西南河安瀾是月韓人安重根戕日本前朝鮮統監伊藤博文於哈爾濱冬十月丁丑朔四川西昌會理交界二板房夷匪爲亂官軍剿平之成都將軍馬亮卒庚辰葬孝欽顯皇后於普陀峪定東陵免梓宮經過州縣地方額賦並賞平毀麥田籽種銀乙

西孝欽顯皇后神牌祔太廟翼日頒詔天下丙戌定成都將軍勿庸統轄松潘建昌以王崑爲成都將軍丁亥直隸總督端方坐違制奪職調陳夔龍爲直隸總督兼辦理通商事務大臣瑞澂署湖廣總督寶葵爲江蘇巡撫以孫寶琦爲山東巡撫丁寶銓爲山西巡撫己丑詔第一二屆籌備憲政事宜內外諸臣應竭誠負責並命憲政編查館稽核所奏成績有因循敷衍措置遲逾者甄劾以聞庚寅憲政編查館上釐定各省提法使官制章程開庫倫哈拉格鑾圖金鐵延祉以疾免命三多署庫倫辦事大臣辛卯江蘇溧陽金壇荆溪宜興丹徒丹陽震澤等縣災發帑銀三萬兩賑之癸巳民政部奏援案請賞米石核定各廠院實需數目收養貧民詔行之賑雲南大姚文山等縣水災甲午大學士孫家鼐卒贈太傅入祀賢良祠賞銀治喪詔以已故五品卿銜山西卽用知縣汪宗沂經學卓越宣付史館賞食餉閑散宗室覺羅人等一月錢糧暨孤寡半月錢糧八旗綠步各營官兵半月錢糧歲以爲常丁酉免雲南元江州屬被水田畝銀米庚子東明黃河安瀾癸卯除廣東緝匪花紅自今文武官有再收花紅者

以職論復前禮部尙書李端棻原官甲辰停今年吉林珠貢乙巳順天紳士請  
爲已故戶部尙書立山內閣學士聯元立祠許之十一月戊申免直隸武清等  
十一廳縣額賦旗租開州東明長垣等三州縣額賦已酉上兼祧母后皇太后  
徽號曰隆裕皇太后翼日頒詔天下癸丑民政部上府廳州縣自治選舉章程  
癸亥復前福建巡撫張兆棟原官設黑龍江瑗瑔沿邊卡倫二十自額爾古訥  
河訖於孫河口乙丑置督辦鹽政大臣以載澤爲之產鹽省分督撫爲會辦鹽  
政大臣行鹽省分督撫俱兼銜丙寅授陸潤庠體仁閣大學士戴鴻慈以尙書  
協辦大學士辛未以貝勒毓朗爲步軍統領癸酉都察院上互選規則乙亥學  
部上女學服色章程予絕學專家已故候選同知直隸州知州華蘅芳與其弟  
故直隸州州判世芳及已故二品封職徐壽俱宣付史館十二月己卯詔求直  
言辛巳增置奉天安圖撫松二縣壬午賞游學專門詹天佑等工科文科法科  
進士工科格致科舉人癸未免山東青城等八十九州縣及衛所鹽場本年錢  
糧乙酉德宗景皇帝神牌先祀奉先殿賞一產三男河南柘城縣民婦張劉氏

通許縣民婦田厲氏米布販廣東佛山等十三廳縣災丙戌定太醫院院使爲四品戊子錄咸豐同治年間戡定髮捻回諸匪功臣後敘官有差除琿春軍隊營房占用旗戶地畝租庚寅趙爾豐奏四川德格土司多格生吉納土改設流官賞土舍都司世襲壬辰慶親王奕劻免管理陸軍貴胄學堂以貝勒載潤代之癸巳增置熱河隆化縣乙未憲政編查館上禁煙條例頒行之復故前湖南巡撫陳寶箴原官丙申憲政編查館上禁買賣人口條款戊戌法部上法官懲戒章程己亥憲政編查館上京師地方自治選舉章程庚子升太醫院左右院判爲五品壬寅憲政編查館上府廳州縣地方自治章程並府廳州縣議事會議員選舉章程癸卯憲政編查館上法院編制法並法官考試任用司法區域分割及初級與地方審判廳管轄案件暫行章程

二年庚戌春正月丙午朔不受朝賀己酉廣州新軍作亂練軍討平之辛亥詔以人心浮動黨會繁多混入軍營勾引煽惑命軍諮處陸軍部南北洋大臣新舊諸軍嚴密稽查軍人尤重服從長官命令如有衆衆開會演說並嚴查禁移

吉林大通縣駐松花江南岸更名方正縣乙卯廣東革命黨王占魁等伏誅丁  
已達賴喇嘛患川兵至出奔諭聯豫等仍遣員迎護回藏辛酉詔奪阿旺羅布  
藏吐布丹甲錯濟塞汪曲卻勒朗結達賴喇嘛名號鹽政處上督辦鹽政試行  
章程癸亥協辦大學士戴鴻慈卒贈太子少保銜賞銀治喪呂海寰等上中國  
紅十字會章程命盛宣懷充會長監察御史江春霖以論慶親王奕劻誤國斥  
回原衙門命郵傳部尙書徐世昌協辦大學士內閣學士吳郁生在軍機大臣  
上學習行走甲子管理軍諮處員勒載濤請赴日本美英法德義奧俄八國考  
察陸軍辛未英國舉行萬國刑律改良會法部奏遣檢察廳長徐謙往與會甲  
戌詔預備立憲宜化除成見悉泯異同自今滿漢文武諸臣陳奏事件一律稱  
臣以昭畫一而示大同二月乙亥朔聯豫請以新噶勒丹池巴羅布藏丹巴代  
理前藏事務丙子禁洋商湖南購運米石辛巳鐵良以疾免以蔭昌爲陸軍部  
尙書梁敦彥爲稅務處會辦大臣免浙江仁和海沙鮑郎蘆瀝四場暨江蘇橫  
浦浦東二場荒蕪竈蕩宣統元年通課壬午免陝西榆林等四州縣舊欠榆林

府倉糧米草束乙酉以內閣侍讀學士梁誠爲出使德國大臣三月民政部上脩正報律下憲政編查館核奏己丑復發帑銀三萬兩賑安徽災壬辰免吉林五常廳樺甸縣宣統元年通賦甲午聯豫奏拉里僧俗暨工布番兵投誠歸化丙申葛寶華卒調榮慶爲禮部尙書以唐景崇爲學部尙書戊申予故湖北提督夏毓秀優卹癸丑憲政編查館上行政綱目籌辦海軍大臣奏各司名目職掌三月乙巳朔王世珍以疾免命雷震春署江北提督己酉雲南威寧邪匪襲昭城官軍剿滅之匪首李老么伏誅辛亥湖南民饑倡變諭擒首要散脅從壬子湖南巡撫岑春煊罷命楊文鼎暫代之遣楊士琦赴南洋充勸業會審查總長丁巳祈雨庚申兩追復故海軍提督丁汝昌原官廢秋審覆審舊制諭沿江各省督撫平糶河南巡撫吳重熹免以資彛代之調程德全爲江蘇巡撫壬戌予遺愛在民故太常寺卿袁昶安徽蕪湖縣建祠癸亥裁奉天巡撫授廣福伊犁將軍甲子革命黨人汪兆銘黃復生羅世勳謀以藥彈轟擊攝政王事覺捕下法部獄庚午旌殉夫烈婦山東曲阜孔令保妻潘氏宣付史館夏四月甲戌



朔詔資政院於本年九月一日開院欽選宗室王公世爵宗室覺羅各部院官  
暨碩學通儒議員八十八人前期召集丙子裁福建督糧道增設巡警道勸業  
道丁丑命載濤充專使大臣往英國弔祭戊寅賞游學畢業生吳匡時等七人  
工科進士法政科舉人有差庚辰憲政編查館修訂法律大臣進現行律命頒  
行之詔曰此項刑律爲改用新律之預備內外問刑衙門當悉心講求依法聽  
斷毋任意出入致枉縱癸未詔各省增設巡警勸業兩道原期保衛治安振興  
實業督撫於已補人員悉心考覈如不能勝任或於缺不宜卽奏明另補毋迴  
護瞻徇乙酉聯豫請西藏曲水哈拉烏蘇江達碩般多及三十六族各設委員  
一人並停藏番造槍造幣兩廠前出使義大利大臣錢恂進和會條約譯詮丁  
亥以江北鹽梟會匪出沒靡常諭雷震春剿撫之已丑度支部上幣制兌換則  
例詔國幣單位定名曰圓暫就銀爲本位以一圓爲主幣重庫平七錢二分別  
以五角二角五分一角三種銀幣及五分銀幣二分一分五釐一釐四種銅幣  
爲輔幣圓角分釐各以十進著爲定制以聯芳爲荊州將軍庚寅定續選納稅

多額十人爲議員辛卯郵傳部侍郎汪大燮充出使日本大臣癸巳梁敦彥以疾免以鄒嘉來署外務部尙書兼會辦大臣除湖北石首縣文義洲地方租課蘆課內申湖南巡撫岑春煊褫職五月內辰升四川寧遠阿拉所巡檢爲鹽邊廳撫夷通判戊午湖南常德府水潦災發帑銀二萬兩賑之李經羲奏雲南永昌府屬鎮康土州改流官增置永康州免雲南陸涼州被旱銀糧辛酉賑江北海州等處水災癸亥都察院代遞諮議局議員孫洪伊等並直省旗籍代表等呈請速開國會詔仍俟九年籌備完全再行降旨定期召集議員宣諭之甲子免湖南苗疆佃民欠租湖南鳳凰乾州永綏保靖瀘溪麻陽古文坪七廳縣積欠屯租穀石已已賑湖北災辛未裁奉天同江廳河防同知六月壬午黑龍江災發帑銀二萬兩賑之乙酉汪大燮進考查英國憲政編輯各書己丑命籌辦海軍事務大臣貝勒載洵充參預政務大臣壬辰命外務部侍郎胡惟德充稅務處幫辦大臣丙申詔各省督撫勞於行政必於籌款而恒疏於察吏不知吏治不修則勞民傷財亂端且從此起新政何由而行其各慎選牧令爲地擇

人斯爲綏靖地方之至計戊戌詔各部院堂官直省督撫嚴劾貪官汙吏並通諭貴戚及中外大臣敦品勵行整躬率屬己亥命載澤壽勳會阿穆爾靈圭載潤查辦前鋒營暨內務府三旗護軍營釐定章程以聞是月山東萊陽紳民相仇匪首曲思文聚衆萬餘圍攻城邑刦殺官兵海陽亦因征收錢糧激變秋七月甲辰裁福建督糧道置勸業道瑞興免以志銳爲杭州將軍乙巳瑞澂楊文鼎奏湘省匪勢蔓延擬行清鄉法從之戊申詔農工商部會同各督撫等調查鑛產熟籌開辦庚戌詔趣各督撫查造官民荒田及氣候土宜圖冊並興舉工藝實業報農工商部奏聞壬子農工商部立度量權衡用器製造廠癸丑貝勒載濤奏考察各國軍政軍人犯罪統歸軍法會議處審斷非普通裁判所得與聞諭照行之甲寅世續吳郁生免軍機大臣以毓朗徐世昌爲軍機大臣命唐紹怡署郵傳部尙書毓朗免步軍統領並專司訓練禁衛軍大臣命烏珍兼署步軍統領設各省交涉使新疆陸軍營官田熙年以擅殺釀變伏誅丙辰安徽皖南南陵宿州靈璧等屬潦災發帑銀四萬兩賑之丁巳法部上秋審條款庚

中前江西提學使浙路總理湯壽潛以劾盛宣懷爲蘇浙路罪魁禍首奪職辛酉賑皖北飢民以忠瑞爲科布多辦事大臣聯魁免新疆巡撫以何彥昇代之改各省按察使爲提法使甲子大學士鹿傳霖卒贈太保入祀賢良祠賞銀治喪乙丑命外務部參議上行走沈瑞麟充出使奧國大臣外務部右丞劉玉麟充和蘭萬國禁煙大會全權委員戊辰奉天開葫蘆島港已置黑龍江訥河直隸廳同知是月載洵薩鎮冰復往美利堅日本兩國考察海軍八月甲戌置奉天鎮東縣乙亥清銳免以鐵良爲江甯將軍癸未命沈家本充資政院副總裁甲申以外務部右丞劉玉麟充出使英國大臣丁亥理藩部奏變通禁止出邊開墾地畝民人聘娶蒙古婦女內外蒙古不准延用內地書吏教讀公牘不得擅用漢文蒙古人不得用漢字命名等舊例許之增置四川昭覺縣己丑聯芳免以鳳山爲荊州將軍命蔭昌兼訓練近畿各鎮大臣甲子命近畿陸軍各鎮俱歸陸軍部管轄裁近畿督練公所增置奉天鹽運使改四川鹽茶道爲鹽運使茶務歸勸業道管理乙未以奏報禁種烟苗粉飾下吉林黑龍江河南山

西福建廣西雲南新疆諸省督撫部議申諭各省嚴切查禁丙午授徐世昌爲  
體仁閣大學士以吏部尙書李殿林協辦大學士丁酉以廓爾喀額爾德尼王  
畢熱提畢畢噶爾瑪生寫熱曾噶叭噶都熱薩哈拒西藏求援兵詔嘉獎之庚  
子賑陝西華渭南兩州縣潦災九月辛丑朔資政院舉行開院禮監國攝政王  
莅會頒訓辭壬寅賞游學畢業生吳乃琛等四百五十九人文醫格致農工商  
法政進士舉人有差癸卯免甘肅河金渭源伏羲安定會寧寧靈循化集九廳  
州縣上年被災地畝錢糧草束丙午江北徐州等屬兩潦災命度支部發帑賑  
之乙巳署綏遠城將軍督辦墾務大臣信勤以疾免調堃岫代之以奎芳爲烏  
里雅蘇臺將軍戊申命度支部再發帑銀二萬兩賑皖北災壬子張人駿以上  
海市情危急請借洋款酌劑並輸運庫帑銀五十萬兩許之癸丑永定河安瀾  
賑四川綿竹等縣縣水災甲寅裁海龍圍場總管丙辰詔直省舉賢良方正從  
嚴甄取己未予積贊興學山東堂邑義丐武訓事實宣付史館裁湖南常德府  
同知寶慶府長安營同知癸亥諭綏遠城墾務緊要沿邊道廳以下官凡關墾

務者均聽舉務大臣節制丙寅楊樞以疾免命農工商部右丞李國杰充出使  
比國大臣賑黑龍江水災丁卯袁樹勳以疾免命張鳴岐署兩廣總督以沈秉  
堃爲雲南巡撫戊辰裁貴州副將游擊都司守備等官免新疆迪化等十一廳  
縣民欠錢糧籽種十月癸酉詔改於宣統五年開國會以直省督撫多以爲言  
復據順天直隸各省諮議局人民代表請願速開國會故有是命甲戌命溥倫  
載澤充纂擬憲法大臣乙亥黃河安瀾丁丑廣西岑溪匪亂官軍剿定之匪首  
陳榮安伏誅程文炳卒以程允和爲長江水師提督命甘肅提督張勳接統江  
南浦口各營免甘肅靈州水災銀米庚辰增韞奏浙江裁綠營改編水師辛巳  
詔以縮改宣統五年開設議院責成各主管衙門切實籌備民政度支法學諸  
部俱有應負責任提前通盤籌畫分別最要次要詳細以聞並誠勉直省督撫  
淬厲精神切實遵行毋再因循推諉致誤限期壬午何彥昇卒以袁大化爲新  
疆巡撫戊戌予故大學士前署兩廣總督張之洞於江甯省城建祠十一月癸  
卯罷陸軍尙書侍郎及左右丞參議改設陸軍大臣副大臣各一人置海軍部

設海軍大臣副大臣各一人以蔭昌爲陸軍大臣壽勳副之貝勒載洵爲海軍大臣譚學衡副之乙巳命海軍提督薩鎮冰統巡洋長江艦隊丙午雲南大姚縣民亂入城刦獄殺人官軍剿定之匪首陳文培鄧良臣俱伏誅己酉命前安徽巡撫馮煦爲江皖籌賑大臣壬子農工商部進編輯棉花圖說丁巳資政院言軍機大臣責任不明難資補助請設立責任內閣詔以朝廷自有權衡非院臣所得擅預斥之雷震春罷命段祺瑞署江北提督庚申陳夔龍奏順直諮議局呈請明年卽開國會論提前豫備事宜已慮不及豈能再議更張命剴切宣示不准再行要求結奏加賞普濟教養局倉米六十石月以爲常辛酉置各省高等審判檢察廳設丞長湖南綏設癸亥東三省國會請願代表來京呈請明年卽開國會軍機大臣以聞詔民政部步軍統領衙門勒歸籍勿逗留再有來京及各省聚衆者察治之甲子詔趣憲政編查館擬訂籌備清單內閣官制並纂擬具奏予故大學士張之洞於湖北省城建祠乙丑慶親王奕劻請免軍機大臣及總理外務部優詔慰留之己巳資政院請明諭剪髮易服十二月壬申

諭各省曉諭學堂禁學生干豫政治聚衆要求違者重治丙子唐紹怡以疾免以盛宣懷爲郵傳部尙書丁丑察哈爾右翼四旗蒙古災發帑銀一萬兩賑之己卯志銳請變通銷除旗檔舊制辛巳召增祺入覲命孚琦署廣州將軍壬午召趙爾巽入覲癸未重申烟禁地方官仍前粉飾者罪之並命民政度支二部考核命各省總督會同憲政編查館王大臣參訂外省官制乙酉裁併江蘇州縣設審判廳江甯以江甯併入上元蘇州以長洲元和併入吳江都併入甘泉昭文併入常熟新湯併入容山震澤併入吳江婁併入華亭陽湖併入武進金匱併入無錫荆溪併入宜興丁亥憲政編查館上遵擬修正逐年籌備事宜清單裁吉林水師營官丁戊子四川匪踞黔江縣爲亂官軍擊卻之復其城己丑考察憲政大臣李家駒進日本租稅制度考會計制度考癸巳四川匪首溫朝鍾竄入湖北咸豐縣境擒斬之乙未命貝子銜鎮國將軍載振充頭等專使大臣賀英君加冕資政院議決新刑律總則分則詔頒布之內申免陝西咸寧等六十四府廳州縣光緒三十三年通賦並廣有倉錢糧草束丁酉資政院上議



決統一國庫章程戊戌資政院奏議決宣統三年歲出歲入總豫算廷杰卒以紹昌爲法部尙書己亥裁甘肅蘭州道置勸業道是月江淮饑人相食東三省疫

三年辛亥春正月庚子朔以山海關外防疫天寒道阻諭陳夔龍錫良安置各省工作人丙午馮煦奏察勘徐淮災狀己酉免江蘇長洲等四十廳州縣田地銀糧庚戌賑江蘇高郵寶應清河安東山陽阜甯等縣水災甲寅度支部上全國豫算章程丙辰釋服御史胡思敬劾憲政編查館言新官不可濫設舊官不可盡裁起草應用正人頒行當採衆議下其章於政務處庚申調志銳爲伊犁將軍廣福爲杭州將軍乙丑除非刑凡遣流以下罪毋用刑訊法部奏上己革綏遠城將軍貽穀罪論死詔改戍新疆效力贖罪乙巳命周樹模會勘中俄邊界是月直隸山東民疫二月庚午朔予故大學士前湖南巡撫王文韶於湖南省城建祠馮煦請濬睢河民政部上編訂戶籍法壬申諭所司防疫毋藉端騷擾並命民政部步軍統領衙門順天府以保衛民生之意諭人民乙亥四川德

格春科高日三土司改設流官置邊北道登科府德化白玉二州石渠同普二縣定應道新疆軍台人犯改發巴藏內子免雲南昆明等三州縣被災田地條糧銀米丁壯免浙江仁和等三十州縣杭嚴二衛衛嚴二所荒地錢糧漕米戊寅改陸軍部海軍部大臣副大臣爲正都統副都統仍以蔭昌壽勳載洵譚學衡爲之英人佔片馬癸未命李家駒撰擬講義輪班進呈丙戌裁駐藏幫辦大臣設左右參贊丁亥頒浙江惠興女學堂貞心毅力扁額己丑外務部上勳章贈賞章程命度支部右侍郎陳邦瑞學部右侍郎李家駒民政部左參議汪榮寶協纂憲法以誠勳爲廣州將軍溥頤爲熱河都統以貝子溥倫爲農工商部尙書世續爲資政院總裁李家駒副之劉若曾爲修訂法律大臣壬辰禁洋商運鹽入口改設英屬檳榔嶼正領事官二月庚子以劉銳恒爲雲南提督裁稽察守衛處置管理前鋒護軍等營事務處三旗護軍仍隸內務府陸軍部奏東三省測量局員焦演賄竇秘密地圖誅之辛丑裁奉天承德錦二縣壬寅裁四川川北重慶二鎮總兵官癸卯頒盡忠節守禮節尙武勇崇信義敦樸素重廉

恥六條訓諭軍人丁未賞陸軍各鎮協統制統領等官何宗蓮李奎元等陸軍副都統銜協都統有差戊申吉林濬圖們江航路通於海己酉命出使義國大臣吳宗濂充專使賀義大利立國慶典庚戌革命黨人以藥彈擊殺署廣州將軍孚琦壬子以薩鎮冰爲海軍副都統趙爾豐奏平三巖野番改孔撤麻書兩土司設流官甲寅授張鳴岐兩廣總督乙卯度支部尙書載澤與英美德法四國銀行締結借款契約丙辰賞伊犁將軍志銳尙書銜伊犁地方文武各官受節制免浙江仁和等三十七州縣並衛所田塘宣統二年銀糧戊午以江皖豫災命馮煦會三省督撫籌春賑己未和蘭開禁烟會於海牙命出使德國大臣梁誠往與會賑科布多札哈沁蒙古游牧災庚申錫良以疾免調趙爾巽爲東三省總督授欽差大臣兼管三省將軍事加直隸熱河道提法使銜辛酉命趙爾豐署四川總督壬人文爲川滇邊務大臣予哀毀殉親前浙江巡撫聶緝契孝行宣付使館癸亥漢儒趙岐元儒劉因俱從祀文廟華商創立大同學校於日本橫濱頒育才廣學扁額丁卯革命黨人黃興率其黨於廣州焚總督衙署

擊走之夏四月辛未楊文鼎請緩裁湖南綠營及防軍甲戌賞游學畢業生鍾世銘汪燦芝等法政科進士舉人工科舉人有差丙子趙爾巽奏請用人行政便宜行事從之丁丑裁山東撫鎮標營官戊寅詔改立責任內閣頒內閣官制授慶親王奕劻爲內閣總理大臣大學士那桐徐世昌俱爲協理大臣以梁敦彥爲外務大臣善耆爲民政大臣載澤爲度支大臣唐景崇爲學務大臣蔭昌爲陸軍大臣載洵爲海軍大臣紹昌爲司法大臣溥倫爲農工商大臣盛宣懷爲郵傳大臣壽耆爲理藩大臣復命內閣總協理大臣俱爲國務大臣內閣總理大臣協理大臣均充憲政編查館大臣慶親王奕劻仍管理外務部置弼德院以陸潤庠爲院長榮慶副之罷舊內閣辦理軍機處及會議政務處大學士協辦大學士仍序次於翰林院裁內閣學士以下官置軍諮府以貝勒載濤毓朗俱爲軍諮大臣命訂府官制趙爾巽會陳夔龍張人駿瑞澂李經羲與憲政編查館大臣商訂外省官制己卯慶親王奕劻大學士那桐徐世昌俱辭內閣總理協理不許趣即任事重申鴉片烟禁諭民政度支二部各省督撫尅期禁

絕詔定鐵路國有先是給事中石長信疏論各省商民集股造路公司弊害宜  
敕部臣將全國幹路定爲國有自餘枝路准各省紳商集股自修上懸之下郵  
傳部議至是奏言中國幅員廣袤邊疆遼遠必有縱橫四境諸大幹路方足以  
利行政而握中樞從前規畫未善致路政錯亂紛岐不分枝幹不量民力一紙  
呈請輒准商辦乃數載以來粵則收股及半造路無多川則倒帳甚鉅叅追無  
着湘鄂則開局多年徒供坐耗循是不已恐曠日彌久民累愈深上下交受其  
害應請定幹路均歸國有枝路任民自爲曉諭人民宣統三年以前各省分設  
公司集股商辦之幹路應卽由國家收回亟圖修築悉廢以前批准之案故有  
是詔辛未吉林火災發帑銀四萬兩賑之癸未贈卹署廣州將軍副都統孚琦  
丁亥資政院請豫算借款兩事歸院會議不許戊子起端方以侍郎候補充督  
辦粵漢川漢鐵路大臣諭裁缺候補人員毋得奏事諭本年秋季調集禁衛軍  
及近畿各鎮陸軍於直隸永平府大操己丑恭親王溥偉以疾免禁煙大臣以  
順承郡王訥勒赫代之庚寅郵傳大臣盛宣懷與英德法美四國銀行締結借

款契約成辛卯龐鴻書罷以沈瑜慶爲貴州巡撫壬辰命督撫曉諭人民鐵路現歸官辦起降旨之日川湘兩省租股並停罷之宣統三年四月以前所收者應由郵傳部督辦鐵路大臣會督撫查奏地方官敢有隱匿不報者詰治楊文鼎奏湘省自開鐵路幹路收歸國有諭旨羣情洶懼譁噪異常徧發傳單恐滋煽動諭嚴行禁止儻有匪徒從中煽惑意在作亂者照懲治亂黨例格殺勿論朱家寶奏江淮交會爲匪黨出沒之區比歲薦飢盜風尤熾請援鄂獨懲辦會匪土匪章程犯者以軍法從事丙申移稅務司附屬之郵政歸郵傳部管理除雲南昆明縣官用田地額賦丁酉賑山東滕嶧二縣災五月庚子用湖南京官大理寺少卿王世琪等言停湖南因路抽收房捐及米鹽捐辛酉楊文鼎奏湖南諮議局呈湘路力能自辦不甘借債據情代奏嚴飭之卹墨西哥被害華僑銀壬寅裁廣西綠營都司守備以下官及馬步兵癸卯山東兗沂曹三府濟寧州災發帑銀三萬兩賑之四川諮議局以紳民自開鐵路國有之旨函電紛馳請緩接收並請停刊謄黃呈王人文代奏人文以聞詔切責之仍命迅速刊刻

騰黃徧行曉諭並剴切開導乙巳免彈春貧苦旗丁承領荒地價銀戊申廷試  
游學畢業生進士江古懷等叙官有差乙卯孫寶琦奏宗支不宜豫政飭之壬  
子起復那桐仍授文淵閣大學士丙辰廣東因收回路事倡議不用官發紙幣  
持票取銀諭張鳴岐防範丁巳資政院上修改速記學堂章程戊午度支郵傳  
二部會奏川粵漢幹路收回辦法請收回粵川湘鄂四省公司股票由部特出  
國家鐵路股票換給粵路發六成湘鄂路照本發還川路宜昌實用工料之款  
四百餘萬給國家保利股票其現存七百餘萬兩或仍入股或興實業悉聽其  
便詔端方迅往三省會各督撫照行之丁寶銓以疾免以陳寶琛爲山西巡撫  
庚申命于式枚總理禮學館甲子內閣上內閣屬官官制法制院官制詔頒布  
之置內閣承宣廳制誥敘官統計印鑄四局設閣丞廳長局長各官並置內閣  
法制院設使能憲政編查館吏部中書科稽察欽奉上諭事件處批本處俱歸  
其事於內閣以繕書房改隸翰林院甲子陸軍部奏簡各省督練公所軍事參  
議官乙丑翰林院進檢討章梈所纂康熙政要六月丁卯命資政院會內閣改

訂院章賑湖南武陵龍陽益陽三縣水災保定陸軍軍械局火藥庫陸軍第二鎮演武廳火藥庫俱火庚辰安徽水無爲州五里碑九連等處圩壞辛巳以榮慶爲弼德院院長鄒嘉來副之陸潤庠免禁烟大臣陳寶琛免山西巡撫以待郎候補伊克坦免都察院副都御史以副都統記名裁兼管順天府府尹壬午以陸鍾琦爲山西巡撫癸未趙爾豐奏收巴塘得榮地方戶民請納糧稅浪藏寺喇嘛千餘人許還俗又奏巴塘臨卡戶民投誠撥隸三壩廳管理乙酉伊克昭盟扎薩克固山貝子三濟密都布旗災發帑銀一萬兩賑之西甯丹噶爾廳及西甯縣匪黨糾衆爲亂官軍擊散之首犯李明李統春李官博儉等伏誅辛卯置典禮院設掌院大學士副掌院學士學士直學士各官以李殿林爲典禮院掌院學士郭曾圻爲副壬辰四川紳民羅綸等二千四百餘人以收路國有盛宣懷端方會度支部奏定辦法對待川民純用威力未爲持平不敢從命呈請裁察王人文以聞詔以一再瀆奏切責之增設和屬爪哇島總領事泗水蘇門答臘正領事甲午湖南常德府大雨河溢浸屬縣壞田廬發帑銀六萬兩賑



之內申以禁煙與英使續訂條件重申厲禁諭中外切實奉行閏六月己亥命  
寶熙充禁烟大臣庚子恩壽以疾免以余誠格爲陝西巡撫癸卯安徽大雨江  
潮暴發濱江沿河各州縣澇災發帑銀五萬兩賑之庚戌調余誠格爲湖南巡  
撫楊文鼎爲陝西巡撫壬子詔本年調集禁衛軍及近畿各鎮軍於永平府大  
操命軍諮大臣貝勒載濤恭代親臨監軍癸丑命貝子溥倫鎮國公載澤會宗  
人府纂皇室大典乙卯革命黨人以藥彈道擊廣東水師提督李準傷而免前  
吉林將軍銘安卒丙辰命載振陸潤庠增祺陳寶琛丁振鐸姚錫光沈雲沛誠  
勳清銳朱祖謀俱充弼德院顧問大臣國務大臣奕劻那桐徐世昌梁敦彥善  
耆載澤唐景崇廕昌載洵紹昌溥倫盛宣懷壽耆及宗人府宗令世鐸總管內  
務府大臣奎俊繼祿俱兼任弼德院顧問大臣丁巳調善耆爲理藩大臣以桂  
春署民政大臣調鳳山爲廣州將軍以壽耆爲荊州將軍川路股東會會長顏  
楷等呈劾郵傳部趙爾豐以聞不報辛酉裁各省府治首縣改置地方審判廳  
乙丑內閣請修訂法規七月壬申趙爾豐奏鐵路收歸國有川民仍多誤會相

率要求諭郵傳部督辦鐵路大臣清理路股明示辦法以釋羣疑甲戌命瑞澂張鳴岐趙爾豐余誠格各於轄境會辦鐵路事宜命端方赴四川按查路事丁丑以四川人心浮動宜防鼓惑諭提督田振邦嚴束營伍彈壓之趣端方速赴四川許帶兵隊趙爾豐王崑率提督司道奏川民爭路激烈請交資政院議決仍歸商辦不許仍責趙爾豐彈壓解散己卯江蘇各屬大雨圩堤潰決田禾淹沒發帑銀四萬兩賑之永定河決端方入川水陸新舊諸軍聽調遣調陸徵祥爲出使俄國大臣劉鏡人爲出使和國大臣辛巳忠瑞免以桂芳爲科布多辦事大臣溥鐸免以薩蔭圖爲科布多參贊大臣壬午四川亂作趙爾豐執諮議局議長蒲殿俊副議長羅綸保路同志會長鄧孝可股東會長顏楷張瀾及胡嶸江三乘葉秉誠王銘新九人尋同志會衆衆團總督署擊之始散賑浙江杭嘉湖紹四府災癸未帝入學大學士陸潤庠侍郎陳寶琛授讀副都統伊克坦教習國語清文賑湖北水災甲申廣東澄海縣堤決發帑銀四萬兩賑之四川旅京人民以爭路開會具呈資政院乞代奏命捕代表劉聲元解歸籍諭學部

約束學生勿預外事並敕所司禁聚衆開會丁亥山東濟南及東西州縣水災  
黃河上游民捻復決發帑銀五萬兩賑之賑福建水災戊子命前兩廣總督岑  
春煊往四川會趙爾豐辦理剿撫事宜己丑監國攝政王閱禁衛軍癸巳以四  
川民亂諭趙爾豐督飭諸軍迅速擊散仍分別良莠剿撫被脅者宥之甲午波  
密野番投誠八月丙申總稅務司赫德卒晉太子太保銜予故成都將軍前伊  
犁將軍馬亮於伊犁建祠壬寅慶親王奕劻復請免內閣總理大臣及管理外  
務部不許甲辰裁直隸督標提標通永天津正定大名宣化各鎮標官弁馬步  
守兵提督依舊丙午江南提督劉光才以疾免調張勳代之以張懷芝爲甘肅  
提督丁未定國樂庚戌置鹽政院設大臣以下官廢鹽務處命載澤兼任鹽政  
大臣癸丑端方瑞澂奏湖北境內粵漢川漢鐵路改歸國有取消商辦公司議  
定接收路股辦法詔嘉之并以深明大義獎士紳甲寅革命黨謀亂於武昌事  
覺捕三十二人誅劉汝夔等三人瑞澂以聞詔嘉其弭患初萌定亂俄頃命就  
擒獲諸人嚴鞠並緝逃亡乙卯武昌新軍變附於革命黨總督瑞澂棄城走遂

陷武昌詔奪瑞澂職仍命權總督事戴罪圖功命陸軍大臣蔭昌督師往討湖北軍及援軍悉聽節制薩鎮冰率兵艦程允和率水師並援之內辰張彪以兵匪構變棄營潛逃奪湖北提督仍責剿匪停永平大操弛山西河南運糧禁武昌軍民擁陸軍第二十一混成協統領官黎元洪稱都督置軍政府嗣是行省各擁兵據地號獨立舉爲魁者皆稱都督革命軍取漢陽製兵工廠鐵廠據漢口丁巳起袁世凱爲湖廣總督岑春煊爲四川總督俱督辦剿撫事宜命貝勒載瀾督禁衛各軍守近畿戊午王人文罷復以趙爾豐爲川滇邊務大臣停奉天今年貢己未岑春煊辭四川總督詔不許趣梁敦彥來京供職京師開糶濟民食壬戌詔長江水陸諸軍俱聽袁世凱節制諭川楚用兵原脅從自拔來歸不咎既往願隨軍自效能禽獻匪黨者優賞之獲逆黨名冊應銷毀毋株連兩省被擾地方撫恤之免裁各省綠營巡防兵壽耆免授連魁荊州將軍癸亥皇太后懿旨發帑銀二十萬兩賑湖北遭兵難民福建龍溪南靖兩縣河溢隄決發帑銀二萬兩賑之以湖北用兵諭山東山西兩省購運米麥濟軍甲子命副

都統王士珍襄辦湖北軍務九月乙丑朔日有食之資政院第二次開會詔勸議員湖南新軍變巡撫余誠格奔於兵艦巡防統領前廣西右江鎮總兵黃忠浩死之內寅陝西新軍變護巡撫布政使錢能訓自殺不克遂走潼關西安將軍文瑞副都統承燕克蒙額俱死之丁卯皇太后懿旨發內帑二十四萬兩賑直隸吉林江蘇安徽山東浙江湖南廣東諸省饑立慈善救濟會戊辰張蔭棠免以施肇基充出使義墨祕魯三國大臣革命黨人以藥彈擊殺廣州將軍鳳山己巳皇太后助帑於慈善救濟會資政院言郵傳大臣盛宣懷侵權違法罔上欺君塗附政策釀成禍亂實爲誤國首惡詔奪職端方奏訪查川亂緣起實由官民交閼而成請釋諮議局議長蒲殿俊及鄧孝可等九人湖北拘留法部主事蕭湘並免議從之以唐紹怡爲郵傳大臣命陳邦瑞爲江皖賑務大臣庚午皇太后出內帑一百萬兩濟湖北軍召廕昌還授袁世凱欽差大臣督辦湖北剿撫事宜節制諸軍命軍諮使馮國璋總統第一軍江北提督段祺瑞總統第二軍俱受袁世凱節制以春祿爲廣州將軍贈卹遇害廣州將軍鳳山馮

國璋與革命軍戰於漢口水陸夾擊漢口復之壬申以瑞澂失守武昌避登兵艦潛逃出省倫生喪恥詔逮京下法部治罪癸酉下詔罪已命溥倫載澤纂憲法條文迅速以聞資政院總裁大學士世續以疾免以李家駒代之達壽爲副桂春回倉場侍郎任趙秉鈞署民政大臣奪湖南巡撫余誠格職仍權管湖南巡撫事山西新軍變巡撫陸鍾琦死之雲南新軍變總督李經羲遁布政使世增及統制官鍾麟同兵備處候補道王振畿輜重營管帶范鍾岳俱死之命湯壽潛總辦浙江團練開黨禁戊戌政變獲咎及先後犯政治革命嫌疑與此次被脅自歸者悉原之資政院言內閣應負責任請廢現行章程實行內閣完全制度不以親貴充任詔聽之順天府平糶甲戌江西新軍變巡撫馮汝駉走九江仰藥死安徽新軍犯省垣擊散之乙亥授袁世凱內閣總理大臣命組織完全內閣慶親王奕劻罷內閣總理大臣命爲弼德院院長那桐徐世昌罷內閣協理大臣及榮慶並爲弼德院顧問大臣罷善耆鄒嘉來載澤唐景崇蔭昌載洵紹昌溥倫唐紹怡壽耆國務大臣俱解部務載瀋罷軍諮大臣以蔭昌爲之

起魏光燾爲湖廣總督命速往湖北陸海各軍及長江水師仍聽袁世凱節制  
調遣丙子召袁世凱來京命王士珍權署湖廣總督用張紹曾言改命資政院  
制定憲法丁丑資政院奏採用君主立憲主義上重大信條十九事發內帑十  
萬兩賑四川遭兵難民戊寅詔統兵大員以朝廷與民更始不忍再用兵力之  
意諭人民諭統兵大員申明紀律禁擾民命第六鎮統制吳祿貞署山西巡撫  
袁世凱辭內閣總理大臣溫詔勉之贈卹殉難山西巡撫陸鍾琦貴州獨立舉  
都督巡撫沈瑜慶通革命軍陷上海袁世凱命前敵諸軍停進兵尋遣知府劉  
承恩正參領蔡廷幹詣黎元洪勸解兵不得要領而還己卯詔許革命黨人以  
法律組政黨資政院言漢口之役官軍慘殺人民請敕停戰諭袁世凱按治軍  
官罪商民損失由國家償之吳祿貞奏遣員入敵軍勸告下令停攻擊親赴孃  
子關撫慰革命軍詔嘉之裁廣東交涉使司江蘇巡撫程德全以蘇州附革命  
軍自稱都督浙江新軍變巡撫增韞被執尋縱之庚辰予第二十鎮統制張紹  
曾侍郎銜宣撫長江會稱疾不赴命張勳充會辦南洋軍務大臣趙爾豐免命

端方署四川總督趙世凱入京釋政治嫌疑犯汪兆銘黃復生羅世勳於獄  
辛巳廣西巡撫沈秉堃自稱都督內閣銓敘局火壬午江甯新軍統制徐紹楨  
以其軍變將軍鐵良總督張人駿提督張勳拒守鎮江陷京口副都統載穆死  
之安徽新軍變推巡撫朱家寶爲都督癸未詔特命袁世凱爲內閣總理大臣  
從資政院奏依憲法信條公舉故有是命呂海寰請依紅十字會法推廣慈善  
救濟會從之廣東獨立舉都督總督張鳴岐遁福建新軍變將軍樸壽總督松  
壽死之甲申皇太后懿旨罷繼祿起世續復爲總管內務府大臣召錫良入覲  
以朝廷於滿漢軍民初無歧視命統兵大員曉諭之乙酉山東巡撫孫寶琦宣  
告獨立順天府奏立臨時慈善普濟赤十字總會於京師罷員勅毓朗軍諮大  
臣以徐世昌代之丙戌貴州江甯戰守將士命呂海寰充中國紅十字會會長  
兼慈善救濟會事東三省諮議局及新軍要求獨立總督趙爾巽不從寢其議  
仍令解勸之丁亥命近畿各鎮及各路軍隊並姜桂題所部俱聽袁世凱節制  
戊子分遣被兵各省宣慰使徵國民意見命各省督撫舉足爲代表者來京與



會議趙爾巽以川事引咎請罷詔不許吳祿貞以兵至石家莊爲其下所殺御史溫肅劾祿貞包藏禍心反形顯著詔陳夔龍按查王士珍以疾免命段芝貴護湖廣總督永定河合龍袁世凱來京己丑以張錫鑾爲山西巡撫溥頤免以錫良爲熱河都統庚寅袁世凱舉國務大臣詔命梁敦彥爲外務大臣趙秉鈞爲民政大臣賡修爲度支大臣唐景崇爲學務大臣王士珍爲陸軍大臣薩鎮冰爲海軍大臣沈家本爲司法大臣張謇爲農工商大臣楊士琦爲郵傳大臣達壽爲理藩大臣俱置副大臣佐之于式枚寶熙充修律大臣紹昌林紹年陳邦瑞王堉吳郁生恩順俱充弼德院顧問大臣辛卯命段祺瑞署湖廣總督起升允署陝西巡撫督辦軍務壬辰浙江巡撫增韞坐擅離職守奪職癸巳以督攻秣陵關餘黨將士奮勇賞張勳二等輕車都尉世職甲午資政院上改訂院章頒布之冬十月丙申內閣奏立憲抵觸事項停召對奏事弼德院軍諮府並限制之廢各衙門直日舊章更命世續復爲文淵閣大學士戊戌伍廷芳張謇唐文治溫宗堯勸告攝政王請贊共和政體庚子以憲法信條十九事誓告太

廟攝政王代行祀事以勞乃宣爲大學堂總監督溥良免命直隸宣化鎮總兵黃懋澄兼署察哈爾都統辛丑命甘肅提督張懷芝幫辦直隸防務四川成都獨立舉都督壬寅督辦鐵路大臣候補侍郎署四川總督端方率兵入川次資州爲其下所殺其弟端錦從並遇害叙復漢陽功封馮國璋二等男爵命科爾沁親王阿穆爾靈圭往奉天會趙爾巽籌畫蒙古事宜變軍犯金陵副將王有宏戰死甲辰孫寶琦罷獨立自劾待罪詔原之褒獎山東官商不附和者發帑犒張勳軍賞梁鼎芬三品京堂會李準規復廣東丙午革命軍陷江甯將軍鐵良總督張人駿走上海張勳以其餘衆退保徐州袁世凱與民軍訂暫時息戰條款停戰三日自是展期再三至決定國體日乃已命徐世昌充專司訓練禁衛軍大臣丁未寶葵免以齊耀琳爲河南巡撫命壽勳會袁世凱徐世昌籌辦軍務戊申哲布尊丹巴胡圖克圖自立逐庫倫辦事大臣三多詔奪三多職己酉贈卹殉難江西巡撫馮汝驤庚戌監國攝政王載灃奏皇太后繼監國攝政王章退歸藩邸皇太后懿旨晉世續徐世昌俱爲太保衛護皇帝諭段祺瑞剿

當陽天門諸路土匪辛亥詔授袁世凱全權大臣委代表人赴南方討論大局以馮國璋爲察哈爾都統資政院請改用陽歷並臣民自由剪髮詔俱行之壬子改訓練禁衛軍大臣爲總統官以馮國璋爲之以良弼爲軍諮府軍諮使贈卹殉難閩浙總督松壽丙辰開黑龍江省太平山察漢敖拉煤鑛丁巳革命軍至荊州署左翼副都統恆齡死之戊午內閣奏行愛國公債票辛酉孫寶琦免以胡建樞爲山東巡撫十一月甲子朔袁世凱請廢臣工封奏舊制乙丑命前署湖北提法使施紀雲前光祿寺少卿陳鍾信四川團練丙寅成都尹昌衡羅綸以同志軍入總督衙切前署四川總督川滇邊務大臣趙爾豐執之不屈死戊辰贈卹死事廣東潮州鎮總兵趙國賢壬申皇太后命召集臨時國會以共和立憲國體付公決初袁世凱遣唐紹怡南下與民軍代表伍廷芳討論大局以上海爲議和地一再會議廷芳力持廢帝制建共和國紹怡不能折以當先奏聞取上裁遂以入告世凱奏請召集王公大臣開御前會議終從其言至是乃定期開國民會議於上海解決國體甲戌各省代表十七人開選舉臨時大

總統選舉會於上海舉臨時大總統立政府於南京定號曰中華民國戊寅勸親貴王公等輸財贍軍大理院正卿定成免以劉若曾代之己卯楊士琦免命梁士詒署郵傳大臣辛巳贈卹署四川總督督辦粵漢川漢鐵路大臣候補侍郎端方及其弟知府端錦罷鹽政院溧州兵變撫定之伊犁新軍協統領官楊續緒軍變將軍志銳死之丁亥告諭哲布尊丹巴胡圖克圖並賚先朝珍物庚寅贈卹殉難署荊州左翼副都統恒齡辛卯袁世凱道遇炸彈不中壬辰命張懷芝兼幫辦山東防務大臣癸巳命所司保護外人的生命財產命舒清阿幫辦湖北防務以烏珍爲步軍統領京師戒嚴十二月甲午朔賞張懷芝巡撫銜己未再予前山西巡撫陸鍾琦二等輕車都尉世職追贈同時遇害其子翰林院侍講陸光熙三品京堂優卹賜諡並旌卹鍾琦妻唐氏丁酉張人駿罷命張勳護兩江總督胡建樞罷命張廣建署山東巡撫吳鼎元會辦山東防務己亥贈卹殉難伊犁將軍志銳辛丑皇太后懿旨以袁世凱公忠體國封一等侯爵命額勒渾署伊犁將軍文琦辦塔爾巴哈台參贊大臣事李家駒免以許鼎霖爲

資政院總裁革命黨以藥彈擊良弼傷股越二日死壬寅袁世凱辭侯爵固讓再三乃受癸卯以復讐關賞銀一萬兩犒軍甲辰以叙漢陽功復張彪提督乙巳以張懷芝爲安徽巡撫贈卹死事福州將軍模壽丁未命張錫鑾往奉天會辦防務李盛鐸署山西巡撫盧永祥會辦山西軍務贈卹遇害軍諮府軍諮使良弼戊申以王廣爲軍諮府軍諮使己酉皇太后懿旨授袁世凱全權與民軍商酌條件奏聞時岑春煊袁樹勳陸徵祥段祺瑞等請速定共和國體以免生靈塗炭故不俟國會召集決定自讓收權遂有是命庚戌命崑源會辦熱河防務辛亥命宋小濂署黑龍江巡撫壬子徐世昌免軍諮大臣贈卹雲南殉難甘肅布政使世增乙卯錫良免命崑源署熱河都統丁巳免江南徐州府未完丁酉銀糧戊午袁世凱奏與南方代表伍廷芳議贊成共和並進皇室優待條件八皇族待遇條件四滿蒙回藏待遇條件七凡十九條皇太后命袁世凱以全權立臨時共和政府與民軍商統一辦法袁世凱遂承皇太后懿旨宣示中外曰前因民軍起義各省響應九夏沸騰生靈塗炭特命袁世凱遣員與民軍代

表討論大局議開國會公決政體兩月以來尙無確實辦法南北睽隔彼此相持商輟於塗士露於野國體一日不決民生一日不安今全國人民心理多傾向共和南中各省既倡義於前北方將領亦主張於後人心所向天命可知予亦何忍因一姓之尊榮拂兆民之好惡是用外觀大勢內審輿情特率皇帝將統治權公諸全國定爲立憲共和國體近慰海內厭亂望治之心遠協古聖天下爲公之義袁世凱前經資政院選爲總理大臣當茲新舊代議之際當爲南北統一之方即由袁世凱以全權組織臨時共和政府與民軍協商統一辦法總期人民安堵海宇乂安仍合滿蒙漢回藏五族完全領土爲一大中華民國予與皇帝得以退處安閒優遊歲月受國民之優禮親見郅治之告成豈不懿歟又曰古之君天下者重在保全民命不忍以養人者害人現將新定國體無非欲先弭大亂期保乂安若拂逆多數之民心重起無窮之戰禍則大局決裂殘殺相尋必演成種族之慘痛將至九廟震驚兆民荼毒後禍何忍復言兩害相形取其輕者此正朝廷審時觀變痼痼吾民之苦衷凡爾京外臣民務當善

體此意爲全局熟權利害勿得挾虛矯之意氣逞偏激之空言致國與民兩受其害著民政部步軍統領姜桂題馮國璋等嚴密防範剴切開導俾皆曉然於朝廷應天順人大公無私之意至國家設官分職以爲民極內列閣府部院外建督撫司道所以康保羣黎非以一人一家而設爾京外大小各官均宜慨念時艱慎供職守應即責成各長官敦切誠勸勿曠厥官用副予夙昔愛撫庶民之至意又曰前以大局阨危兆民困苦特飭內閣與民軍商酌優待皇室各條件以期和平解決茲據覆奏民軍所開優禮條件於宗廟陵寢永遠奉祀先皇陵制如舊妥修各節均已一律擔承皇帝但卸政權不廢尊號並議定優待皇室八條待遇皇族四條待遇滿蒙回藏七條覽奏尙爲周至特行宣示皇族暨滿蒙回藏人等此後務當化除畛域共保治安重視世界之昇平胥享共和之幸福予有厚望焉遂遜位

論曰帝冲齡嗣服監國攝政軍國機務悉由處分大事並白太后取進止大變既起遽謝政權天下爲公永存優待遂開千古未有之奇虞實在位文物猶新

是非論定修史者每難之然孔子作春秋筆則筆削則削所見之世且詳于所聞一朝掌故烏可從闕億亦爲天下後世所共鑒歟